

Tärä Tikani Käne Pablokwe

Nitre Tesalónicabokrä

1 Tesalonicenses

Tärä ne abko tikani Pablokwe kä 50-51 angwane, aiseite tärä ne abko tikani bäri käne kwe. Pablo nikani Ngöbö kukwei kuin kädriere juta Tesalónicate angwane, nikani Silvanobe amne Timoteobe. Pablo namani Ngöbö Kukwei kuin kädriere juta Tesalónicate angwane, ni kwati namani romon kräke, abtä ngitiani, nikani nebe juta Atenate mda. Yebti Pablo tö namani rikai sribireta Tesalónicate nitre tödekaka Jesubti Tesalónicabo die mikakäre nüne bäri Jesukrä, akwa ñan nika-ninta yete. Akwa nitre Tesalónicabo tödekaka Jesubti nämane ja tare nike nitre tödekaka ñakare Jesubti ye kisete, aiseite Timoteo aibe jua-ninta Pablokwe tärä ne ngwena nitre Tesalónicabo die mike. Ye abko tä tikani Hechos 17.1-14 yebtä.

Pablokwe tärä juani abko tikani krörö kwe ja täritäri: nitre Tesalónicabo gätäkä Jesu käbti abko kräke Ngöbökwé jändrän kuin nuenbare, abtä Pablokwe kuin niebare Ngöböye. Erere arato, Ngöbö nämane bentre abko Pablokwe mikaninta töre ietre.

Bobukäre abko, Pablokwe nünabare ño nitre Tesalónicabo ngätäite amne niaratre tarebare ño kwe abko mikaninta töre kwe ietre. Pablokwe tärä tikani kore nitre Tesalónicabo die mikakäre nüne käre Jesukristokrä.

Bämäkäre abko, Pablokwe nitre Tesalónicabo töi diani nüne bäri Jesukristokrä. Mdakäre abko, ni tödekaka Jesubti tä krüte, btä dreta nakenkä abko niebare kwe ietre. Mräkäre abko, nikwe Jesukristo ngi-biadre ngäbti ño kisere abko niebare kwe arato.

Pablota köbö ngwentari

1 1 Mun gätäkä Jesu käbti tä neketi ni Rün Ngöbökwé amne ni Dänkien Jesukristokri käta nüne juta Tesalónicate, ye ie ti Pablo, Silvano amne Timoteo käta köbö ngwentari. Ngöbö raba ja moto mike kuin munkrä amne, mun raba nüne

jäme Ngöbö diebti, ie nun tö.

Pablota kuin niere nitre Tesalónicaboye

2 Ja mräkätäre, käre nunta kuin niere Ngöböye mun jökrä-btä amne, nunta blite Ngöböbe angwane, nunta blite ben munkrä. **3** Erere arato, nunta blite

Ngöbö ni Rün nikwebe angwane, munta tödeke kwatibe Ngöböbti abtä munta sribi kuin nuene ni mda mdakrä abko käre tä nuke töre nunye. Erere arato, munta Ngöbö tarere abtä munta jändrän kuinquin nuene ni mda mdakrä abko käre tä nuke töre nunye. Erere arato, munta ni Dänkien Jesukristo ngibiare ngäbti abtä munta nünenkä dite ja tare nikakäre tödekabtä Jesubti abko käre tä nuke töre nunye.

4 Ja mräkätäre, Ngöböta mun tarere. Niarakwe mun dianinkä jen jakrä, ye abko gare kuin nunye, **5** ñobtä ñan angwane nun jataba kukwe kuin Jesukristobtä kädriere munbe angwane, ñan munkwe blitabare jirekäbe, akwa nun köböire Ngöbökwé ja di kri mikani gare munye amne, Ngöbö Üai Deme käkwe sribi nuenbare kri mun ngätäite. Erere arato, kukwe ne abko era metre munkrä abko nämä gare munye. Ye mden kisete, Ngöbökwé mun dianinkä jen jakrä gare kuin nunye. Erere arato, nun nämä munbe angwane, nun nämä jändrän kuinquin aibe nuene munkrä abko garera mun jökräye. **6** Ye abko, nun nämä nüne ño, erere arato ni Dänkienkwe nünabare ño, ye kwrere mun jatani nüne abko krörö: Munkwe kukwe kuin Jesubtä kani ngäbti, ye dokwäre mun nämä ja tare nike, akwa Ngöbö Üai Deme köböire kä namani bäri nuäre munbtä. **7** Ye mdenbtä abko, nitre gätäkä Jesu käbti nünanka kä Macedoniate amne kä

Acayate, kräke mun nämane ütiäte kri, aiseite munkwe nünabare ño, ye abko käkwe niaratre töitikani nünanbtä. **8** Erere arato, kukwe kuin ni Dänkienbtä, ye abko ñan nitre Macedoniabo amne Acayabo aibe ie gare akwa, mun köböire kukwe ye nena gare mente temen. Ye aiseite ñan munkwe kukwe ye mikadre gare amne batibe rabadi gare ni mda mdaye, **9-10** ñobtä ñan angwane nun nükani mun ngätäite angwane, munkwe nun kani ngäbti ño, ye abko garera ni mda mdaye. Erere arato, munkwe jändrän dätebare ngöbö ngwarbere tuanimetre ño, bti munkwe Ngöbö nire era metre kani ngäbti ño sribikäre kräke, amne Jesu Ngöbö Odei tä kä käinbti abko munta ngibiare ngäbti abko nena gare ni mda mdaye abko erere tä niere nunye. Jesu ye abko müre ketani, bti Ngöbökwé mikaninta nire. Ngöbökwé ni mikadi ja ngie nuen, ye ngäniene Jesuta ni dentari.

Sribi Pablokwe nitre Tesalónicabobe

2 1 Ja mräkätäre, nun janama mun kanti, ye abko ñan nun janama ngoto nike ngwarbe, ye gare kuin munye. **2** Nun janama mun kanti, ye känenkri nun nämä juta Filipos angwane, nitre yete käkwe nun mikaba ja tare nike kri amne nun mikaba ngwarbe jae kwetre arato. Nun rüe rababa kwati mun kanti arato, akwa Ngöbökwé nun die mikaba ja kukwei kuin kädriere munbe,

aisete nunkwe ja moto mikaba kwekbe blitakäre munbe, **3** ñobtä ñan angwane kukwe era erere nunkwe kädriebe amne, ñan nun nämä blite ja tõi blobti. Erere arato, nun ñan tö rababa mun ngökai jire chi. **4** Akwa Ngöbökwe tödekani nunbti sribi ne nuenkäre, käkwe nun mikani ja kukwei kuin kädriere abko erere nunta dirire. Ye abko nun ñan tö ni mda mda moto mikai nuäre diribtä kore, akwa Ngöbö aibe nun tö moto mikai nuäre, ñobtä ñan angwane Ngöbö aibe kätä ni moto ño abko tuente aiseti. **5** Ye mdenbtä, nunkwe ñan blitaba nuäre nuäre jire bati mun näkwitakäre. Erere arato, ñan nun janama bike kuin munbe ngwian diänkäre jae munkän, ye gare kuin munye amne tuen kuin Ngöböye. **6** Erere arato, ñan nun käikitadrekä munkwe amne ni mda mdakwe, abkokäre nunkwe Ngöbö kukwei kädriebe.

Nun abko Jesukristo kukwei ngwianka, aiseti nun rabadre sribi ütiä kärere munye, akwa nunkwe käräba ñakare munye. **7** Akwa ngäbäkre chi därebe meye kwe tä ngibiare kianbtä abko ben meyeta blite jäme, kwrere jire nunkwe blitaba jäme munbe. **8** Erere arato, mun tare bäri kri nunkwe, aiseti ñan nunkwe kukwe kuin Ngöbökwe aibe mikaba gare munye, amne nun tõi ño ño abko käi rababa nuäre nunbtä mike gare jökrä munye, ñobtä ñan angwane mun tare kri nunkwe aiseti. **9** Ja mräkätre, nun nämane Ngöbö kukwei kuin

Jesubtä kädriere munbe angwane, käre nun nämane ganane mrökrä jae. Nun nämane sribire tare dibire rare, ñobtä ñan angwane nun ñan tö namani sribi mikai mun kötärä, ye tä töre kuin munye, ruen nunye.

10 Mdakäre abko, mun ngä-täite nunkwe nünanba deme amne metre Ngöbö ngwärekre amne, ni mda mda ñan rababa ñäke blo nunbtä, ye munkwe tuani amne Ngöbökwe tuani arato. **11-12** Ye abko, ngäbäkre rün kwe käkwe tõi dian amne die mika kwe, ye kwrere nunkwe mun tõi diani jändrän kuin nue-ne amne, mun moto ulire angwane, nunkwe kä mikaninta nuäre nunbtä, ye tä gare munye, ruen nunye. Erere arato, ni jen Ngöbökwe käkwe nünandre ño abko erere nunkwe nünamna munye. Kä nuäre te Ngöböta gobrane, ye kanti niarata mun kärere rabakäre siba jabe.

13 Nun nämane Ngöbö Kukwei kädriere munbe angwane, kukwe ye abko munkwe kani ngäbti Ngöbö Kukwei ara jire kwrere amne, ñan kukwe mikanintbe ni mdakwe, kwrere munkwe kani ngäbti. Yebtä abko, käre nunta kuin niere Ngöböye arato, ñobtä ñan angwane Ngöbö Kukwei ye abko tä sribire mun tödekaka Jesubti ye töibtä mtare. **14** Ye abko ja mräkätre, nitre jen Ngöbökwe gätäkä Kristo Jesu käfti kä Judeate abko mräkä israelita käkwe ngwiani ja tare nike kri tödekabtä Jesubti, ye kwrere munkwe ja tare nikani

tödekabtä Jesubti mun mräkä Tesalónicabo kisete. **15** Kira abti kä nüke mtare nitre israelita tä ni juani Ngöbökwe blitakäre bentre kämike abko krörö: Nitre israelita abko käkwe ni Dänkien Jesu müre ketani. Ye kwrere Ngöbö kukwei niekä kira müre ketani kwati kwetre arato. Erere nun juanintari kä ye kanti kwetre arato. Yebtä Ngöbö moto ñakare nuäre kräke amne, niaratre tä ja rüere ni jökräbe abko krörö: **16** Nitre ñakare israelitare rabadre dianintari, abkokäre nun töta nebe kukwe kuin Jesubtä kädrie bentre angwane, nitre israelita tätre neme ja rüere nunbe. Ne kwrere nitre israelita tä ja mike ngite bäri kabre krübäte. Yebtä abko Ngöbö moto gadadi, käkwe ngwiandi ja ngie nuen kri krübäte.

Pablo tö namani ja tuaita nitre Tesalónicabobe

17 Ja mräkätre, ni ngidianin-kä jötrö ken jene jene ja okwä bäre mento angwane, ni nämane ja tuenta ñakare akwa, käre munta ja töibtä nunkwe amne, bäri nun tö namani rikai ja tuakäreta munbe arato. **18** Nun tö namani rikai mun kanti, akwa ti Pablo, ti ne bäri tö rababa rikai bäre bäre akwa, Satana-kwe ji ötaba nun käne, aiseti nun ñan namaninta mun kanti. **19** Nun tö rababa näin bäri, ñobtä ñan angwane Jesu rükadita angwane, mun tädi näin käre Jesube, bti nunta tödeke. Mun tädi näin käre Jesube

angwane, Jesu rükadita näire, käi rabadi nuäre nunbtä amne ja rabadi ruen ütiäte sribi nunkwebtä nunye Jesu ngwärekre, aiseti nunta tödeke bäri krübäte munbti. **20** Ne aiseti mun ütiäte kri nunkrä amne, mun käi nuäre kri nunbtä arato.

3 **1** Nun tö rababa mun tuai bäri, aiseti nun ñan rababa neme nuäre, abtä nun aibe rabadi kaibe juta Atenas nete abko nunkwe ükateba kore angwane, **2** nun mräkä Timoteo abko juanba nunkwe. Timoteo abko tä sribire Ngöböbe kukwe kuin Kristobtä kädriere. Nunkwe niara juanba mun tõi ketabtäkäre Jesubtä amne, mun kitakäre nüne bäri Jesukrä. **3** Erere arato, kukweta nakenkä taretare mun rüere, yebtä munkwe ñan ja tõi mikadre ngwarbe kwäräkwärä abkokäre nunkwe juanba, ñobtä ñan angwane nita ja tare nike tödekabtä Jesubti, ye tä käre ni jiete, ye garera mun jökräye. **4** Ye garera kore munye, ñobtä ñan angwane nun nämä munbe yete angwane, nikwe ja tare nikadi kri abko nunkwe nieba munye, mden erere tä nakenkä nibtä abko nena gare munye arato. **5** Ne mdenbtä abko, mun tõi nämane Jesubtä ya abko ti Pablo ne tö rababa gai amne, ti ñan rababa neme nuäre, käkwe Timoteo juanba kukwe gain jakrä, ñobtä ñan angwane nane Satanakwe kukwe käme mikadre mun jiete mun nuatekäre ja käne, ye abko jürä rababa krübäte tibtä, amne nane nunkwe

ngoto nikani kri ngwarbe abko jürä rababa tibtä arato.

Timoteo nukaninta Pablo kanti kukwe kuin ngwena

6 Akwa Timoteo janama Tesalónica mun kanti yete, rükabata angwane, mun tä tödeke kwatibe Jesubti amne, mun tä ja tarere kwärikwäri amne ni mda mda tarere, ye abko kukwe kuin järükaba kwe nunkrä. Erere arato, käre nunta nuke töre munye ja moto kuinbti amne, nun tö ja tuaita munbe, ye kwrere mun tö ja tuaita nunbe arato, nieba Timoteokwe nunye. 7 Ne mdenbtä abko kä rababa nuäre nunbtä amne, ja rababa ruen dite nunye ja mräkä, ñobtä ñan angwane nunta ja tare nike kri abtä jata nebe ruen diäne nunye akwa, mun abko tä tödeke Jesubti, ye abko bäri käi nuäre nunbtä. 8 Mdakäre abko, munta nünenkä dite ni Dänkien Jesu diebti ye gaba nunkwe abko käta nun die mike bäri mda. 9 Nebtä abko kukwe ñan tä nebe kwen jire mda nunye kuin niekäre Ngöbö nikweye munbtä. Erere arato, munkwe kä mikani nuäre kri nunbtä Ngöbö ngwärekre, yebtä abko nunkwe kuin niedre ño mda Ngöböye ñan tä nebe nuke gare nunye arato. 10 Ngöbökwä kä biandre nunye niken ja tuenta gwärere munbe ie nun tö, ñobtä ñan angwane dre dre ngämi gare munye, rabadre mun die mike tödeke bäri Jesubti, yebtä abko nun tö näin mun die mike bäri abko nunta ribere dibire rare Ngöböye.

Pablota blite Ngöböbe

11 Tita blite krörö Ngöböbe mun kräke: Ngöbö ni Rün nikwe ara amne ni Dänkien Jesu käkwe nun jie tika nebata mun kanti abko ie nun tö. 12 Mdakäre abko, nunta mun tarere ño, ye kwrere ni Dänkien käkwe mun mikadre ja tarere bäri kwärikwäri amne, ni mda mda tarere bäri mda arato. 13 Erere arato, ni Dänkien Jesu jatadita nitre deme kwe ben, ye ngäbti Ngöbö ni Rün nikwe käkwe mun töi mika dite nünakäre metre amne deme ja ngwärekre abko ie nun tö. Abko kore se.

Ñan ja mikadre gure jire chi bati bati, akwa nünandre deme

4 1 Mdakäre, ja mräkäre, munkwe nünandre metre kä mikakäre nuäre Ngöböbtä, ye nunkwe diribarera munye abko erere munta nüne. Mtare munkwe nuna janknu kore köbö kwatirekwatire abko nun tö ribei munye ni Dänkien Jesu käfti, 2 ñobtä ñan angwane ni Dänkien Jesu käkwe nun mikani kukwe dirire munye abko nunkwe diriba munye, ye nena gare mun jökräye abko krörö:

3 Mun rikadre nüne bäri deme mda Ngöbökrä köbö kwatirekwatire, ie Ngöbö tö abko krörö: munkwe ñan ja mika gure jire chi bati bati. 4 Erere arato, mun töi raba ngitiekä ja mikabtä gure tiebe ni mda mdabe angwane, munkwe ja ngrabare ye näkwita au amne, munkwe nuna kuin

deme amne ja mika ütiäte kwärikwäri munkwe. 5 Nitre ie Ngöbö gare ñakare abko tä ja gaire ñakare jändrän ngwarbe kwrere, ye kwrere munkwe ñan nuna. 6 Mdakäre abko, mun ja mräkäre Jesu käfti käkwe ñan kukwe nuen blo ja rüere kwärikwäri amne, munkwe ñan ja ngöka kwärikwäri ja mräkä merire, bra-re mikabtä ja ken bati bati, ñobtä ñan angwane ni kukwe nuenkä käme mräkä rüere kore abko ni Dänkienkwe mikadi ja ngie nuen abko nunkwe niebara munye amne, nunkwe mun mikabara mokre btä. 7 Ye abko, Ngöbökwä ñan ni käräbare ja mikakäre ngite kore ni mda mdabe akwa, Ngöbökwä ni käräbare nünakäre kuin deme jakrä. 8 Ne mden aise, nire nire mun ngä-täite käkwe kukwe ne kitadre temen angwane, ñan ni kä nebtä kukwei kitadre temen kwe akwa, Ngöbö ja Üai Deme bianka nie, ye ara jire kitadre temen kwe.

9 Ja mräkäre, munta ja tarere kwärikwäri, yebtä abko nun ñan raba tarä tike munye, ñobtä ñan angwane Ngöbö ara käkwe mun töi tikani ja tarere kwärikwäri. 10 Munta ja mräkäre tödekaka Jesubti nünanka kä ngrabare temen Macedonia yete tarere jökrä bkänä. Ye abko kuin akwa, munkwe ja taredre bäri mda köbö kwatirekwatire abko nunta nire munye.

11 Mdakäre abko, munkwe ja töi mika nünanbtä jäme amne, munkwe töbika bäri kukwe jakwebtä. Mdakäre abko,

sribidre jen jakrä munkwe, niebare nunkwe munye, ye kwrere munkwe sribi ja kise jenbti jakrä. 12 Munkwe ne nuendre mun rabadre ütiäte nitre tödekaka ñakare Jesubti ye okwäbti abkokäre. Erere arato, munkwe nünandre kore jändrän jen jakwebti. Ye kwrere munkwe ñan jändrän ni mdakwe ngibiadi nünankrä jae abko ie nun tö.

Jesu jatadita nirekrä abko Pablockwe niebare

13 Mdakäre abko ja mräkäre, ni mda mda käta tödeke ñakare Jesubti abko ni mda ñakare tödekakrä kwetre, aise, mräkäta krüte kän angwane, motota nötöte krübäte jiebti. Ye kwrere ñan rakadrekä munbtä, abkokäre ni tödekaka Jesubti tä krüte angwane, dreta nakenkä btä abko nun tö mikai gare krörö munye:

14 Jesu müre ketani, bti nükainta nire, ye abko garera nie amne era nikrä. Ye kwrere arato, ni tödekaka Jesubti krütanikrütani, ye abko Ngöbökwä mikadita nire rikakäre Jesube abko era nikrä arato. 15 Ni Dänkien Jesu ara käkwe kukwe diribare, erere nunta nire munye abko krörö: Ni Dänkien Jesu jatadita angwane, nitre tödekaka bti tä nüne, ye ñan rikadi ben ni krütanikrütani känenkri, 16 ñobtä ñan angwane ni tödekaka Jesubti krütanikrütani rükadita nire käne. Ni Dänkien Jesu ara jire jatadita kä käinbti timonkwäre angwane, ni kukwei jaradi kri kä käinbti timonkwäre. Erere arato, angele

ütiäte kri abko kukwei jaradi amne, trombeta ngó ká käinbti abko kukwei jaradi ni Dänkien káne arato. Ye ngwane ni tödekaka Kristobti krütanikrütani, ye ara jire rükadita nire káne. **17** Yebti ni tä nüne nüne abko jänäin gwaire nitre yebe mütate-ta käin ni Dänkien Jesu ngäbti. Ye ngwane ni rabadi nüne käre-käre ni Dänkienbe. **18** Ne aiseite munkwe blita kukwe nebtä ja die mikakäre kwärikwäri.

5 **1-2** Mdakäre abko ja mräkät-re, ni Dänkien Jesu jatadita ne abko rakadiká ñongwane ti rabadre niereta munye, akwa ti bike niere ñakare munye, ñobtä ñan angwane garera metre krörö munye: Ni gokä rükadre gore ñongwane gare ñakare ju bkän-käye, akwa batibe rükadre gore deo, ye kwrere jire ni tädi ni Dänkien ngibiare ngäbti ñakare angwane, batibe jatadita. **3** Ne kwrere arato, meri ñan mobe bren kwe kisete, ye kákwe ja ngi-biadre ñongwane metre gare ñakare ie, akwa batibe ja ngibia käi tä nüke ie, ye kwrere nitre tödekaka ñakare Jesubti tädi niere krörö: Mtare kukwe ñakare. Nita nüne kuin jáme, tädi niere. Ye ngwane ni Dänkien Jesu jata-dita kákwe juandi ngwarbe jökrä amne ñan kwäräbedre jire kwetre.

4 Akwa mun abko ñan tä nüne ká ikote ja mräkät-re, aiseite ni Dänkien Jesu jatadita abko btä mun töita, aiseite munta ngibiare ngäbti kisere mun ñan kwandre jáme ie. **5** Ye abko, mun jökrä tä

nüne ká ngwente Ngöbö träte. Ñan nita nüne mente Ngöböye ká ikote amne ñan nita nekete ká ikokri. **6** Ne mden kisete ni tödekaka Jesubti kákwe ñan nünandre okwä kware, akwa ni tädre ngwä-te niara ngibiare ngäbti amne nikwe ja ngibiadre kukwe käme-käme ngäniene. **7** Nita kibien abko tä kibien deo abko gare nie. Erere arato, ni dröbaka dröbaka tä dö ñaen ká ikote deo, ñobtä ñan angwane nitre tödekaka ñakare Jesubti abko, ietre Ngöbö gare ñakare, aiseite ñan tä ni Dän-kien Jesu ngibiare ngäbti. **8** Akwa nitre tödekaka Jesubti tä nekete ká ngwen yekri amne nikwe kukwe kämekäme bätäkä ngwa-rbe nuendre ñakare nitre dröbaka ye kwrere. Akwa ari töbike kuin ja káne kukwe kämekäme rüere. Erere arato, ari tödeke kwatibe Jesubti amne, ni rükä káta jän-drän ribi mike ja mäträbti ja ngi-biakäre, ye kwrere ari ja tarere kwärikwäri ja ngibiakäre. Ne kwrere arato, ni Dänkien Jesu jatadita ni diantarikäre, ye ngäbti abko ari niara ngibiare kisere, ño ni rükä káta sobro balinkwatere ribi mike ja dokwäbti ja ngibiakä-re ye kwrere. **9** Nikwe nünandre kore, ñobtä ñan angwane ñan Ngöbökwé ni dianinkä ja ngie nuakäre akwa, niarakwe ni dia-ninkä jen jakrä ni diantarikäre ni Dänkien Jesukristo köböire. **10** Nita nire ya o ni krütarera ya, akwa ni rabadre nüne käre-käre ni Dänkien Jesukristobe, ne mden-käre ni Dänkien Jesukristo krütani ni kräke. **11** Ne aiseite munkwe

ja moto mika nuäre kwärikwäri nünakäre dite ni Dänkien Jesukristo kräke amne, munkwe ja mika bäri dite nünakäre ni Dänkien Jesukristo kräke. Ye abko munta nuene, akwa nuen janknu munkwe.

Nünandre ño jabe kwärikwäri

12 Ja mräkät-re, kukwe mda nun tö nibi ribei munye abko krörö: Nitre mun jie ngwianka káta sribire mun ngätäite amne tä mun töi tike era metre ni Dän-kien Jesubti, ni ye abko munkwe mika ütiäte jae. **13** Erere arato, sribi nuenta kwe, yebtä raba tare kri munkwe amne munkwe mika bäri ütiäte jae.

Mdakäre abko, munkwe nuna jáme jabe kwärikwäri, ie nun tö. **14** Mdakäre abko ja mräkät-re, nire nire btä ká krene sribire, yebtä munkwe ñäkä ietre amne, nire nire moto ulire abko munkwe die mika ká mikakäreta nuäre btä. Erere arato, nire nire di krüte abko munkwe die mika. Erere arato, mun ñan moto raba romon jötrö jötrö ni mda mda-krä. **15** Mdakäre abko, munkwe ja mika juto kukwe ne nuene abko krörö: Ni mdakwe kukwe nuen blo mun rüere akwa, munkwe ñan ja ngie mika amne, munkwe jändrän kuin nuen jakrä kwärikwäri, ye kwrere munkwe nuen ni mda mda ñakare tödekaka Jesubti kräke.

16 Käre munkwe ká ngwian bäri nuäre jabtä. **17** Käre munkwe blita Ngöböbe. **18** Kukwe ño erere, btä munkwe kuin nie

Ngöböye, ñobtä ñan angwane ni tödekaka Kristo Jesubti kákwe kuin niedre Ngöböye abko ie Ngöbö tö.

19 Mdakäre abko, sribi Ngöbö Üaikwe ñan dokwä takä munkwe. **20** Erere arato, ni Ngöbö kukwei niekä, ye ñan kukwei mika ngwarbe munkwe, **21** akwa tä Ngöbö kukwei niere metre ya, ñakare ya, ye mika ñäräre kuin munkwe amne, kukwe kuin nie kwe ne ngwane, munkwe kukwei mika era. **22** Erere arato, kukwe kämekäme bätäkä ngwarbe, ye ngäniene ká mikaka munkwe.

Kukwe niebare mrä Pablokwe

23 Mräkäre abko, Ngöbö ni mikaka nüne jáme jabe kwärikwäri amne ni mda mdabe, Ngöbö ye ara kákwe mun die mika nüne kuin deme. Amne ni Dän-kien Jesukristo jatadita, ne ngwane ja ñan rabadre ruen ngite niara ngwäreki munye, abko-käre Ngöbökwé mun üai amne mun ngrabare üka kuin kukwe kämekäme ngäniene. **24** Ngöbö mun käräkä abra tä ja kukwei mike täte era metre amne kukwe ne rabadi bare täte jökrä ie.

25 Ja mräkät-re, munkwe blita Ngöböbe munkrä. **26** Erere arato, munkwe köbö ngwiantari jae angwane, munkwe ja demain era metre ja moto kuinbti. **27** Mräkäre abko, munkwe ñäkä tarä nebtä ja mräkä mda mdakrä abko tita niere munye ni Dänkien kabti.

28 Ni Dänkien Jesukristo raba ja moto mike kuin mun kräke. Ne abko kore. Ne ngörä.

Tärä Tikani Bobukäre Pablokwe

Nitre Tesalónicabokrä

2 Tesalonicenses

Pablo nämane juta Corintote angwane, niarakwe tärä ne tikani juandre nitre gätäkä Jesu käfti nünanka juta Tesalónica kanti. Tärä 1 Tesalonicenses jänikani Silvanokwe amne Timoteokwe nebe Tesalónica yete, abti nukaninta Pablo kanti juta Corintote. Yebti tärä ne tikani Pablokwe nitre Tesalónicabokrä. Jesukristo jatadreta ño amne jatadreta ñongwane abko Pablo tö namani dirii nitre tödekaka Jesubti Tesalónicabo yeye abko erere tikani kwe tärä nebtä. Niara tö namani kukwe tikai kore, ñobtä ñan angwane Jesu kebera nuketa, aiseite ñan sribidre jire chi mda mrö ganainkrä jae abko ni ruäre dirikätre blo nukani dirire Tesalónica yete. Nitre ruäre tödekaka Jesubti käkwe kukwe ye mikani era jae, aiseite ñan nämane sribire mda mrö ganaine jae.

Akwa Jesu ngämi nuke abko Pablo tö namani niei metre ie, aiseite tärä ne tikani juandre ietre. Jesukristo jatadita angwane, ni jökrä käkwe tuadi. Akwa ngämi nuke, känenkri ni jatai iti, kä rikai ni ngökö kwati krübäte amne rabai sribire Satana diebti arato. Jesukristo jatadita angwane, ni jökrä tödekaka ñakare bti abko Ngöbökwe mikadi ja ngie nuen kri abko Pablokwe niebare ietre.

Akwa Jesu ngämi nuketa, känenkri nitre tödekaka Jesubti nünanka juta Tesalónicate käkwe nünandre metre amne sribidre mrö ganainkrä jakrä kwetre abko Pablokwe niebare ietre.

Pablota köbö ngwentari

1 1 Mun gätäkä Jesu käfti tä nekete ni Rün Ngöbökri amne ni Dänkien Jesukristokri kätä nüne juta Tesalónicate, ye ie ti Pablo btä Silvano amne Timoteo kätä tärä ne tike. 2 Ngöbö ni Rün nikwe amne ni Dänkien Jesukristo raba ja moto mike kuin mun kräke amne, mun raba nüne jame niaratre diebti.

Pablota nitre tödekaka Jesubti mike ütiäte jae

3 Ja mräkätre, munta tödeke bäri mda Jesubti amne, mun itire itire kätä ja tarere bäri kwäri-kwäri, aiseite nunkwe kuin niedre käre käre munbtä Ngöböye ruen nunye. **4** Abtä nitre Ngöbökwe tä gätäre, ye kanti nunta mun käikitekä abko krörö: Kukwe tareta-re tä nakenkä munbtä tödekabtä

Jesubti abko kisete munta ja tare nike, akwa munta nünenkä dite jabtä amne Jesu rükente ñakare amne munta tödeke janknu Jesubti abko nunta niere ietre.

5 Ye abko, Ngöbö abra kukwe ükatekä era metre ni jökrä kräke abko bä mikata munkwe abko krörö: Munta ja tare nike tödekabtä Jesubti, aiseite niarata gobrane, ye kanti mun tädi biare nüne ben abko niarakwe niedi. **6** Akwa Ngöbö abra kukwe ükatekä metre aiseite, nire nire tä mun mike ja tare nike, ni ye abko Ngöbökwe mikadi ja tare nike mun dokwäre. **7** Erere arato, mun ja tare nikaka, ye abko Ngöbökwe mikadi jadüke nunbe gwaire. Ye abko, ni Dänkien Jesu tä kä käinbti abko jatadita angele dite dite kwe ben ñukwä jutrate, ye angwane ni mikadi jadüke Ngöbökwe. **8** Ni Dänkien Jesu jatadita angwane, nire nire ie Ngöbö gare ñakare amne ñan tä ni Dänkien Jesu kukwei kuin mike täte, ni ye abko niarakwe mikadi ja ngie nuen. **9** Ye angwane juandi ngwarbe käre-käre kwe amne niaratre ñan rabadre jire chi ni Dänkien kanti amne ni Dänkien Jesu di kri bä nuäre ñan tuadre jire kwetre. **10** Akwa ni Dänkien Jesu jatadita angwane, ni deme kwe-kwe käkwe käikitadikä. Erere arato, nitre tödekaka niarabti töi ñan rabadi krüte niara tuare. Nitre ne ngätäite mun tädi siba, ñobtä ñan angwane kukwe kuin Jesubtä abko nunkwe

niebare munye angwane, munkwe mikani era aiseite.

11 Kukwe rakadikä kore gare kuin nie, aiseite käre nunta blite Ngöböbe munkrä amne, Ngöbö-kwe mun käräbare, yebtä mun die mikadre nüne niarakrä kwe abko nunta ribere ie. Erere arato, mun tö jändrän kuinkuin nuein, ye erere btä mun die mika kwe, jändrän ye mikakäre neme bare. Erere arato, munta tödeke Jesubti, ye köböire sribi jökrä btä Ngöbö raba mun die mike abko nunta ribere ie. **12** Nunta ribere kore Ngöböye ni Dänkien Jesu rabadre käikitaninkä mun köböire amne Ngöbö amne ni Dänkien Jesukristo käkwe mun käikita-drekä ja moto kuinbti, abkokäre nunta blite kore Ngöböbe mun kräke.

Jesu jatadita, ye näire dre rakadikä

2 1 Ja mräkätre, ni Dänkien Jesukristo jatadita angwane, niarakwe ni ükadikrö jökrä ketetibe jabe. Köbö ye ngibiare kwärä abko nun tö ribei krörö munye: **2** Ni Dänkien rükadreta abko erere köböi nura, aiseite ni Dänkien nürate ye abko Ngöbö Üaikwe mikani gare tie, ye ni mda mda jata niere munye, yebtä munkwe ñan ja töi kwita amne munkwe ñan kä jürä ngwian jire chi jabtä. Mdakäre abko, ni Dänkien rükadreta abko erere köböi nura, aiseite ni Dänkien nürate abko nunkwe diribare amne nunkwe juani täräre abko ni mda mda raba niere,

akwa nun abko kukwe ye kwrere niere ñakare. **3** Munkwe ñan ja ngökamna jire chi, ñobtä ñan angwane ni Dänkien Jesu rüka-dreta, ye känenkri ni kwati rika-di rüre Ngöböbe amne, ni jatadi iti Ngöbö rüere abko ni Ngöbö Kukwei kitaka temen abko rüka-di. Akwa Ngöbökwé ni ye juandi ngwarbe mrä. **4** Ni ye abko Ngöbö rüe, aiseite jändrän jökrä mikata Ngöböre amne mikata ütiäte ngöbö kwrere, ye ben nia-ra rabadi ja rüere. Erere arato, rabadi ja mike bäri ütiäte jändrän jökrä ngöböre ye ngwä. Abtä ju blitakrä Ngöböbe, ye kanti ni ye näin kākwe ja mikadi bäri kri Ngöböbti ta, kākwe ja Ngöbö niedi.

5 Ye abko, tikwe nüanabare mun ngätäite angwane, tikwe blitaba kukwe nebtä munbe, ¿ye töre ñakare munye ya? **6** Ni Ngöbö Kukwei kitaka temen ye abko rabadi mikani gare kä ngrabare temen, akwa köböta kitani Ngöbökwé, ye känenkri ni ye ñan rükadre ja mike gare, ñobtä ñan angwane jändrän keteti tä kete-btä. Jändrän ye abko jändrän ño garera munye. **7** Kä ne ngwane Satanata kukwe miketbe käme, ye abko nena näin kä ngrabare temen akwa, nita iti käta ni Ngöbö Kukwei kitaka temen ye kete-btä, akwa ni ye diandikä angwane, **8** ni Ngöbö Kukwei kitaka temen ye kākwe ja mikadi gare kä ngrabare temen. Akwa ni Dänkien Jesu jatadita angwane, niarakwe müre tākādi ye kākwe ni ye gadikā amne niara trä niadi

bä nuäre ye kākwe müre ketadi arato. **9** Akwa ni Dänkien Jesu ngämi nuketa, känenkri ni Ngöbö Kukwei kitaka temen ye kākwe sribidi Satana diebti, aiseite rabadi sribi kri ñan tuabare nuene amne di rabadi krübäte jändrän bätäkā ngwarbe nuenkäre akwa, ye abko bä rabadi sribi Ngöbökwé kwrere ni ngökakäre. Sribi kri, yebtä ni kwati töi ñan rabadi krütare. **10** Erere arato, kukwe käme nuendi bätäkā ngwarbe kwe, ni mden mden tä biare riatekäre ye ngökakäre. Nitre tä biare riatekäre tätre ja dokwä mike ribi, aiseite ñan tö kukwe era metre Ngöbökwé tarei, abtä ñan rabadre dianintari amne riadite jökrä. **11** Ne aiseite Ngöböta niaratre töi kwite ngwarbe, ni ye rabadre kukwe ngwarbe mike era jae abkokäre. **12** Ne abko ni jökrä btä käta neme nuäre kukwe diän diän nuene abko ñan tä kukwe era metre mike era jae, ni ye mden abko Ngöbökwé juandi ngwarbe jökrä.

Kukwe diribare Pablokwe abko ketadrete dime ja kisete

13 Mdakäre abko, ja mräkäre tare ni Dänkien Jesukwe, nunkwe kuin niedre kärekäre munbtä Ngöböye, ñobtä ñan angwane mun rabadre dianintari, abkokäre kena dekä Ngöbökwé mun dianinkä jakrä. Sribi Ngöbö Üaikwe mun mikakrä nüne deme Ngöbökrä amne munta kukwe metre Jesubtä mike era jae, ye köböire Ngöbökwé mun dianintari. **14** Ye

rabadre bare, abkokäre kukwe kuin diribare nunkwe Jesubtä munye, köböire Ngöbökwé mun kärebare jakrä. Ni Dänkien Jesukristo bä nuäre, ye kwrere mun rabadi kwitani, abkokäre Ngöbökwé mun kärebare jakrä. **15** Ye mden kisete ja mräkäre, nunkwe kukwe diribare gwärere munye amne, nunkwe tikani taräre munye, ye munkwe ñan käikwitakata jire chi jabtä amne, munkwe ketate dime ja kisete, ie nun tö. **16** Ni Dänkien Jesukristo btä Ngöbö ni Rün nikwe kākwe ni tarebare amne jändrän kuin nuenbare ni kräke ja moto kuinbti kwetre, kākwe kä mikani nuäre nibtä kärekäre amne ni die mikani jändrän kuin kä käinbti ngibiakäre kise-re. **17** Niaratre ara kākwe mun mika ruen dite munye amne mun die mika sribi kuin nuenkäre amne kukwe kuin niekäre abko ie nun tö.

Nitre tödekaka Jesubti kākwe blitadre Ngöböbe Pablokrä

3 **1** Ja mräkäre, mräkäre kukwe kuin ni Dänkien Jesubtä, ye nun rikadre ngwena jötrö kä jökräbti temen. Erere arato, kä namani nuäre munbtä kukwe kuin ye mikakäre ütiäte jae, ye kwrere ni mda mdakwe mikadre ütiäte jae, abkokäre munkwe blita Ngöböbe nunkrä. **2** Erere arato, ni diän diän töi kämekäme Ngöbö rüere, ye ngäniene Ngöbökwé nun ngibiadre, abkokäre munkwe blita Ngöböbe nunkrä.

3 Ni Dänkien käta kukwe niere, erere tä mike täte. Niara ye ara kākwe mun die mikadi nüne jakrä amne, mun ngibiadi kwe ni rüe käme Satana ngäniene. **4** Nunkwe kukwe diribare munye, erere munta nuene, amne munkwe nuendi käre ruen nunye. **5** Ngöböta ni tarere ño, ye kwrere ni Dänkien Jesu raba mun die mike ja tarere kwäri-kwäri amne, Kristo kākwe ja tare nikani angwane, nüanankabare dite kwe jabtä, ye kwrere niara raba mun töi tike nünenkä dite jabtä ja diebti, ie nun tö.

Ni jökrä kākwe sribidre

6 Ja mräkäre, mun mräkä mden mden tä nekete Jesukri, akwa kä krene btä sribire amne, kukwe diribare nunkwe tä mike ñakare täte, ni yebe munkwe ñan ja geta jire chi abko nunta niere munye ni Dänkien Jesukristo käbti. **7** Tita kukwe ne niere munye, ñobtä ñan angwane nunkwe nüanabare ño mun ngätäite, ye kwrere munkwe nüandre garera munye abko krörö: Nun nämane mun kanti, ye ngwane nunkwe kä ngwiani krene ñakare jabtä. **8** Erere arato, nunkwe ñan mröbare ngwarbe ni mda mdakän, ñobtä ñan angwane nun ñan tö namani sribi mikai kri dikaro mun kötarä, kä nämane sribire dibire rare mrökrä jae. **9** Nunkwe mrö ribedre munye abko rabadre dbe akwa, sribidre ño jen jakrä abko nun tö namani bä mikai mun okwäbti, ne kwere munkwe nuendre arato,

abkokäre nunkwe sribibare kore mrökrä jae. **10** Mdakäre abko, nun nämane mun kanti yete angwane, nunkwe kukwe ükate-ba krörö munkrä: Nire nire ñan tö sribire käkwe ñan mrödre, nunkwe nieba.

11 Akwa ni ruäre mun ngä-täite abko tä dikekä ngwarbe krö kwäräkwärä, kä krene btä amne, ñan tö sribire. Käre tä ja mike kukwe ni mda mdakwe te ta abko nunkwe gaba. **12** Ni ye kwrere kwrere abko käkwe sribi jame mrökrä jae abko nun tö niei ie amne, nunta mikamna sribire ni Dänkien Jesukristo käfti. **13** Akwa mun mda mda abko ñan raba dräre sribi kuin nuene.

14 Erere arato, tärä juanta nunkwe, ne nire nire ñan tö raba mikai täte, ye abko mika ñäräre kuin munkwe, bti raba-dre ja gaire, abkokäre munkwe

ñan ja geta ben. **15** Akwa mun-kwe ñan mika ñäräre ja rüe kwrere amne, ni mräkä nikwe töi dian, ye kwrere munkwe töi dian jirekäbe.

Kukwe mrä ja mräkä Tesalónicabokrä

16 Ja mräkätre, ni Dänkien kä jame bianka ye käkwe mun moto mika nüne jame köbö kwatire-kwatire kukwe bätäkä ngwarbe te abko nunta ribere Ngöböye. Ni Dänkien raba munbe.

17 Ti Pablo käta köbö ngwen-tari mrä munye amne tita kukwe mrä ne tike ja kise jenbti, tita kukwe tike ño rabadre gare mun-ye abkokäre. Ne kwrere tita tärä juen metre rabadre gare munye, abkokäre tita kukwe tike kore mrä. **18** Ni Dänkien Jesukristo raba ja moto mike kuin mun jökrä kräke. Ne abko kore. Ne ngörä.

Tärä Tikani Käne Pablokwe Timoteokrä 1 Timoteo

Ni nitre tödekaka Jesubti jie ngwianka, kräke Pablokwe tärä tikani ketamä. Ne mden ngätäite abko tärä ne tikani käne kwe Timoteoye. Tärä ne abko, ni nitre tödekaka Jesubti jie ngwianka töi diankrä sribibtä.

Timoteo abko sribi muko Pablokwe. Niara nämane bati angwane Pablokwe dianinkä sribikäre jabe. Niara nämane nüne juta Listrate, kä Asiate. Niara rün abko griego amne meye abko israelita. Pablokwe kukwe kuin Jesubtä mikani gare juta Listrate angwane, Timoteo käkwe tödekani Jesubti. Abti Pablo nükani bobukäre juta Listrate angwane, Timoteo dianinkä kwe sribikäre jabe abko tä tikani Hechos 16.1-4 yebtä. Yebti Timoteokwe sribibare raire Pablobe kukwe kuin Jesubtä mikakäre gare kä ketareketare temen. Abti Timoteo nämane nitre gätäkä Jesu käfti juta Efesote jie ngwena. Timoteo käkwe nünan-dre ño amne sribidre ño, btä Pablokwe tärä ne tikani Timoteo die mikakäre.

Mdakäre abko, ni ño mikadre ni nitre tödekaka Jesubti jie ngwianka amne die mikaka abko tikani kwe Timoteoye. Mdakäre abko, nitre tödekaka Jesubti nämane Efeso, ngätäite kukwe namani kri kriübäte, ñobtä ñan angwane ni ruäre namani kukwe ngwarbe dirire abko nika-ni niren bäri mda. Timoteo abko käkwe kukwe ne ükadrete ño abko Pablokwe niebare ie.

Kukwe ne abko raba ni die mike kri mtare. Nikwe ni ño diandrekä sribikäre ni jie ngwianka kwrere abko tärä ne tä mike gare nie. Erere arato, ni ño diandrekä sribikäre nitre jie ngwianka die mikaka abko tärä ne tä niere. Mdakäre abko, ni nitre tödekaka Jesubti jie ngwianka käkwe nünandre ño amne sribidre ño abko 1 Timoteo ne tä niere nie.

Pablota köbö ngwentari Timoteoye

1 1-2 Ti Pablo käta tärä ne tike mae Timoteo. Ti ne abko Kristo Jesu kukwei ngwian-ka. Ngöbö ni Diantarikä amne

Kristo Jesu, bti nita tödeke ye käkwe ti mikani ja kukwei ngwianka. Sribi tikwe ye köböire makwe tödekani Jesubti, aisete ma abko ti ngobo tikwe kwrere Timoteo. Ngöbö ni Rün nikwe btä Kristo Jesu ni Dänkien raba

ja moto mike kuin makrä amne ma raba ruentari tare ietre. Erere arato, ma raba nüne jame niarate diebti, ie ti tö.

Kukwe blo dirikätre, ietre Timoteokwe ñäkädre

3 Timoteo, ni nämä juta Efesote, bti ti jataba kite Macedonia nete angwane, ni ruäre nämä dirire blo abko ñan diridre kore mda kwetre makwe niedre ietre, abkokäre ma rabadre yete, tikwe nieba mae. 4 Kukwe mikanintbe ngwarbe kirakira aibebtä niarate tä ja däkweite amne nire därebare mräkä ütiäte kirakri, btä kukwe ñan krütare, aibebtä tä ja däkweite abko ñan nuendre kore makwe niedre ietre, abkokäre ma rabadre yete. Kukwe mikanintbe ngwarbe kirakira, yebtä ni kwati tä neme ja kwete angwane, ñan tä ja kite sribi Ngöbökwe yebtä angwane, tödekadre ño metre Ngöböbti abko dirita ñakare. Akwa tödeka Ngöböbti, ye köböire Ngöböta sribire ni kwekwe ngätäite. Ye mden kisete, kukwe ngwarbe, yebtä ja däkweitadre ñakare amne diridre ñakare abko makwe nie ietre. 5 Akwa ja taredre kwärikwäri kwetre, abkokäre makwe nie kore ietre. Ni töi deme bti nikwe ja taredre metre. Arato kukwe käme nuendre ñakare kwetre, ja rabadre ruen ngite ñakare Ngöbö ngwäreki abkokäre. Erere arato, nikwe tödekadre era metre Jesubti amne, ñan bike ni tödekaka Jesubti kwrere. Kore nikwe ja taredre kwärikwäri. 6 Ni ruäre

ñan tä kukwe ye nuene mda, käta ja kwete jirekäbe kukwe ngwarbebtä. 7 Niaratre tö rabai Kukwe Biani Ngöbökwe Moiséye dirikätre, abtä jata kukwe ye dirire metre nieta kwetre, akwa kukwe ye tä dre niere metre abko ñan tä nüke gare ietre, aiseite tä dirire blo.

8 Kukwe Biani Ngöbökwe Moiséye, ye dirita metre ne ngwane, kukwe ye kuin ni die mikakrä garera nie. 9 Akwa Ngöbökwe ñan ja kukwei biani Moiséye ni nünanka metre ye kitakäre ngite. Akwa ni kukwe ye mikaka ngwarbe jae, kräke Ngöbökwe mikani, ni ngite ye mikakäre gare ie. Erere arato, ni dokwä ribi ribi, ni rüere Ngöbö rüere, ni diän diän kukwe kämekäme nuenkä, ni Ngöbö jürä ngwen ñakare amne, ni Ngöbö kukwei mike ütiäte ñakare jae abko kräke Ngöbökwe ja kukwei mikani nuendre, ni ngite ye mikakäre gare ie. Mdakäre abko, ni ni rün btä ni meye kämikaka amne, ni ni mda mda kämikaka abko kräke Ngöbökwe ja kukwei mikani nuendre, ni ngite ye mikakäre gare ie. 10 Ne kwrere arato, ni merire, ni brare ja mikure bati bati amne, ni brare bike merire, ni merire bike brare, ni ngäbäkre mikaka ja ken, arato ni ni mda mda rürümoinkä mikakäre klabore amne, ni ni ngökaka amne ni blitaka ngwarbe ni mda mda rüere amne, ni kukwe nuenkä kämekäme Ngöbö kukwei metre rüere kore, mden kräke Ngöbökwe ja kukwei

mikani nuendre, ni ngite ye mikakäre gare ie. 11 Akwa Ngöbö Kukwei dirita metre, ye abko käta kukwe kuin nuäre Ngöböbti niere metre. Angwane Ngöbö käikitadrekä ni jökräkwe. Kukwe kuin Ngöbökwe, ye mden Ngöbökwe ti mikani ngwianka ni jökräye.

Jesukristokwe kukwe nuenbare kuin Pablokrä

12-13 Ngöbökre ti mikani sribire jakrä, ye mdenbtä tita ni Dänkien Kristo Jesu demaine. Niarakwe ja di biani tie sribi ne nuenkrä. Ti nämane tödeke ñakare Jesubti angwane, ti nämane ñäke blo niara rüere. Erere arato, nitre tödekaka niarabti, jiebtä ti nämane näin kisere mikakäre ja tare nike amne, ti nämane rüre krübäte Jesukristo rüere. Akwa ti nämane tödeke ñakare bti, aiseite ti nämane kukwe ye nuene Ngöbö rüere nämane gare ñakare tie. Abtä Ngöbökre ja ngie mikani ñakare, käkwe ti ngwiani ruen bobre jae amne tödekabare kwe tibti angwane, ti mikani ja kukwei ngwianka kwe. 14 Ni Dänkien käkwe ja moto mikani kuin krübäte tikrä amne kukwe kuin nuenbare kabre kwe tikrä amne ti die mikani kwe tödeke metre jabti. Erere arato, ti die mikani kwe ni mda mda tarere. Ne abko namani bare Kristo Jesu diebti.

15 Kukwe ne abra kukwe era metre abko rabadre era ni jökrä kräke abko nere: Kristo Jesu nükani kä nebtä ni kukwe

kämekäme nuenkä dentari. Ni kukwe kämekäme nuenkä, ye ngätäite ti abko bäri käme. 16 Ye mden kisete, Ngöbökre ti ngwiani ruen bobre jae. Ti nämane kukwe nuene bäri käme Jesu rüere ni mda mda ngwä akwa, Jesukwe ñan ja ngie mikani ti rüere angwane, ti ngibiabare raire kwe tödekakäre jabti. Ne köböire abko, Jesukristo tä ni tarere kri rükadre gare ni jökräye angwane, tödekadre kwetre Jesubti, ye angwane nünandre kärekäre ben, abkokäre Ngöbökre ti ngwiani ruen bobre jae kore. 17 Mtare ti tö Ngöbö käikitaikä. Ngöbö abra gobranka kärekäre. Niara krüte ñakare amne tuen ñakare. Ngöbö mda ñakare jire, aiseite Ngöbö itibe aibe raba mikani ütiäte kärekäre jae amne raba käikitaninkä. Abko kore se. Amen.

18-19 Timoteo, ti ngobo tikwe, ma rabadre sribire ja di ngöibti Ngöbökrä, abkokäre tita kukwe nuemna kore mae. Ni Ngöbö kukwei niekä käkwe blitabare mabtä sribi makwebtä, ye kwrere tita kukwe nuemna mae. Erere arato, makwe nüna deme amne, kukwe käme nuen ñakare makwe abtä ja rabadre ruen ngite ñakare mae Ngöbö ngwäreki. Ni ruäre abko ñan tö namani ye nuein mda, aiseite mikani ji blobti. 20 Ye mden abko nakaninkä Himeneobtä amne Alejandrobtä, abkokänti tikwe mikani gare Satanaye mda. Nebtä abko ñan ñäkädre blo Ngöbö rüere kwetre abkokäre.

Ngöbö mikadre ütiäte ño gätäte

2 1 Timoteo, kukwe mdara jire btä ti tö blitai bäri käne mabe abko krörö: Nitre tödekaka Jesubti ye kākwe jändrän ribe Ngöböye amne blita kwetre Ngöböbe ni jökrä kräke. Erere arato, ja di kārā kwetre Ngöböye ni jökrä kräke amne kuin nie kwetre Ngöböye. **2** Ne kwrere arato, ni gobranka krikri btä ni sribikā ütiäte ütiäte gobrankrä, ye kräke blita kwetre Ngöböbe, nikwe nünandre jāme amne deme Ngöbö ngwārekri, abkokäre blita kwetre Ngöböbe niaratrekrä. **3** Nita blite kore Ngöböbe, ye abko tā neme tuen kuin Ngöbö ni Diantarikāye amne kätä neme nuäre btä. **4** Niara tö ni jökrä diantari amne, kukwe era metre Jesubtä rabadre gare ni jökrāye, ie niara tö, **5** ñobtä ñan angwane Ngöbö itibe ni jökrä kräke. Erere arato, ni itibe ni kwrere, aibe köböire ni jökrä raba ja māketa Ngöböbe abko Kristo Jesu ara. **6** Kristo Jesu kākwe ja mikani müre ketadre ni jökrä kökatarikrä Ngöbökrä. Ye abko, köböi kitani Ngöbökwē, erere namani bare, niara tö namani ni jökrä diantari bā mikakäre. **7** Ni jökräkwē kukwe ne kadre ngäbti, abkokäre Ngöbökwē ti mikani kukwe ye kädriekā amne ngwianka nitre ñakare israelitareye abko kukwe metre Jesubtä diridre tikwe ietre abkokäre. Ne abra kukwe era erere tita niere; ñan tita ni ngökö.

Ni brare btä ni merire rabadre ño gätäte

8 Mdakäre abko, munta gätäre angwane, ni brare brare kā jökräbti kākwe nūna deme amne blita Ngöböbe angwane, küde kaka kāin kwe blitakäre Ngöböbe abko ie ti tö. Ni brare brare tā blite Ngöböbe angwane, ñan rabadre romon ni mda mdakrä amne kukwe ñakare nikwe ni mda mda rüere abko blitadre kwe Ngöböbe.

9 Mdakäre abko, ni merire merire abko kätä Ngöbö mike ütiäte jae, ye rükadre gare ni jökrāye, abkokäre ñan ja ngwā kita kwetre ni mda mda okwā mikakäre ja jiebtī, akwa ja ükate kuin era metre kwetre, ie ti tö. Amne ñan ja dokwā söka bātākā ngwarbe kwe, ni mda mda okwā mikakäre ja jiebtī. Erere arato, ñan jändrän orore orore kitadre bäri ja ngrabare, ñan jändrän tuäre tuäre amne dān ütiäte ütiäte kita kwetre jabtā. **10** Akwa sribi kuin nuendre ni mda mdakrä, ñobtä ñan angwane meri mden mden kätä Ngöbö mike ütiäte jae kākwe ja kitadre sribi kuin nue-ne aisetē.

11 Mdakäre abko, ni merire merire kākwe ni Ngöbö kukwei dirikā ye kukwei nuadre kā bube amne rabadre juto biare kukwe ye mike tāte. **12** Erere arato, nitre tödekaka Jesubti kätä gätäre, ye kanti ni merire kākwe ñan diri jire ni brareye. Erere arato, ñan ja mikadre ni brare brare dänkiene, ie ti tö. Ni merire raba

kwekbe, **13** ñobtä ñan angwane Ngöbökwē Adān dātebare käne. Abti Eva dātebare kwe aisetē. **14** Erere arato, Adān ngökani ñakare angwane, merire kwe Eva abko namani ngökani tbikwe. Ye kanti Evakwe ja mikani ngite Ngöbö rüere. **15** Akwa ni merire tā ngäbäkre ngibiare, ye ngwane tödekadre kwatibe kwe Ngöböbti angwane, ni mda mda taredre kwe. Erere arato, nünandre era metre kwe Ngöbö ngwārekri, ye köböire rabadi dianintari Ngöbökwē.

Ni tödekaka Jesubti jie ngwianka

3 1 Mdakäre abko, kukwe ne abra kukwe era metre abko ti bike niere mae: Nire tö ja mikai nitre tödekaka Jesubti jie ngwianka, ye abko tö sribi kuin nuein. **2** Nire erere tö sribi ye nuein abko kākwe nünandre krörö: Tādrera nūne metre ni mda mda okwäbti. Nebtä ni mda mdakwe ñan kädrie blo. Arato meri itibe kwe. Erere arato, ni töbike kuin ja käne amne ni nūne kwekbe amne, ni mda mda ta mike ütiäte jae, ni ye kwrere kākwe sribidre. Erere arato, ni juto biare ni menteni kaen ngäbti ja juete amne, ni ie diri gare kuin kākwe sribidre. **3** Erere arato, ni dröbare ñakare amne, ni ngüdrekā ñakare kākwe sribidre amne, ni moto jāme btä ni romone ñakare amne, ni ngwian tarekā ñakare abko kākwe sribidre.

4 Mdakäre abko, ni ni mrākā jie tike kuin btä ngibiare kuin

amne, tā ngäbäkre kwekwe tö den kuin abko erere ngäbäkretā kukwe mike tāte, ni ye abko kākwe sribidre, **5** ñobtä ñan angwane ni ie mrākā jie tika gare ñakare kuin kākwe ñan nitre jen Ngöbökwē gätākā Jesubti ngibiadre kuin aisetē. **6** Erere arato, ni tödekaka krire Jesubti ñan mikadre nitre tödekaka Jesubti jie ngwianka, ñobtä ñan angwane nane ni tödekaka krire Jesubti mikadre sribire angwane, rikadre bike kri ño diablu namani bike kri, kanti Ngöbökwē mikani ja ngie nuen, ye kwrere ñan rakadrekā, abkokäre ni tödekaka krire Jesubti kākwe ñan sribidre. **7** Erere arato, ni nitre tödekaka Jesubti jie ngwianka, ye abko nitre tödekaka ñakare Jesubti kätä mike ütiäte jae, ni ye kwrere kākwe sribidre, ñobtä ñan angwane niara mikata ütiäte ñakare ne ngwane, niara mikadi yakrä jae angwane, diablukwe kukwe blo mikadre jiete angwane, nane ja mikadre ngite kwe.

Ni ni die mikaka

8 Ne kwrere arato, ni krörö krörö mikadre ni ni Ngöbökwē die mikaka: Ni mikata ütiäte jae ni mda mdakwe abko mikadre sribire. Arato ni ja kukwei kite ñakare temen amne, ni dröbare ñakare btä ni ni ngökö ñakare ngwian diankrä jae abko mikadre sribire. **9** Mdakäre abko, kukwe era Jesubtä mikani gare nie Ngöbökwē kata ngäbti kweri amne, tödekata bti metre; ñan

bikata ni tödekaka Jesubti kwere kwe abko mikadre sribire.

10 Erere arato, ni mikadre sribi ye nuene, känenkri tä nüne kuin ya, ñakare ya abko mikadre ñäräre käne. Yebti kukwe ñakare kwe, ne ngwane mikadre sribire ni ni die mikaka kwrere.

11 Nitre merire mikata ütiäte jae ni mda mdakwe. Erere arato, meri töbike kuin ja käne amne, jändrän jökräbtä tödekadre bti, meri ye kwrere kākwe sribidre amne, meri näin blite ngwarbe kwäräkwarä ni mda mdabtä abko ñan mikadre sribire.

12 Mdakäre abko, ni ni Ngöbökwe die mikaka, ni ye abko meri itibe kwe amne, ngäbriänkä kwekwe btä mräkä kwekwe jie tikadre kuin kwe btä ngibiadre kuin kwe. 13 Nire nire käta sribi ye nuene kuin, ye abko rabadre bäri ütiäte ni mda mda ngwäre-kri. Ye kwrere ñan rabadre Kristo Jesu gaire amne, Kristo Jesu köböire rabadre blite jame Jesu-btä ni mda mdabe.

14 Timoteo, ti tö näin ja tua-käreta mabe yete, akwa ye känenkri tita tärä ne tike mae, 15 ñobtä ñan angwane nane ti ñan rabata jötrö angwane, ni ja mräkäre Jesu käbti kākwe nūnandre ño abko rabadre gare mae angwane, ma rabadre dirire ietre, abkokäre tita tärä tike mae. Ngöbö nikwe abko Ngöbö nire, amne ürä btä jä ju ketatekrä dite krö, ye kwrere nitre gätäkä Jesu käbti tä niara kukwei era metre mike ütiäte käre. 16 Kukwe era Jesubtä

nāmane tiebe, akwa mtare Ngöbökwe mikanina gare nie. Kukwe nāmane tiebe ye abko bäri ütiäte kri nikrä abko köböire ni raba nüne deme Ngöbökrä. Kukwe ye abko nere:

Jesukristo därebare

angwane, ngrabare

nāmane ni kwrere.

Angwane Ngöbö Odei jen

kwe bä mikani Ngöbö

Üaikwe.

Angele Ngöbökwē kākwe

tuani.

Abti kukwe kuin niarabtä

diribare kä jökräbti

temen.

Kukwe ye mikani era ni

kwatikwe kä nebtä amne,

Ngöbö nikani ngwenante

kä nuärete kä käinbti.

Pablota Timoteo tö den dirikätre blobtä

4 1-2 Mdakäre abko, Ngöbö Üai tä kukwe mike gare metre nie kä mräbtä abko krörö: Kä mrä angwane, ni ruäre kākwe Jesukristo gibiadikāta amne, üai käme ni ngökaka, ye jiebtä rika-di. Üai käme ni ngökaka kākwe ni tödekaka Jesubti ngwiandi dirikätre blo mike ütiäte jae amne ngwiandi Jesu gibiadikāta. Dirikätre blo abko ni bikaka kuin amne ni ngökaka, ie ja ruen ngite ñakare kukwe kämekāme nuenbtä, kākwe kukwe diribare ietre üai kämenkwe ye diridi ni mda mdaye. 3 Ye abko, ja mikadre gure ñakare abko ni ye jatadi niere. Erere arato, ni ye abko kākwe mrö ruäre dokwä tākadi.

Mrö ruäre käme Ngöbö ngwäre-kri, aisete ñan kwetadre niedi kwetre. Akwa Ngöbökwē mrö dātebare ni krāke, aisete ni tödekaka Jesubti, ie Ngöbö kukwei era metre gare, kākwe mrö jökrä kadre ngäbti kwetadre jae, kuin niere kwärä Ngöböye btä. Mden kisete ni ñan raba mrö ruäre dokwä täke. 4-5 Mrö btä jändrän jökrä dātebare Ngöbökwē abko kuin niebare kwe, aisete ñan käi ngwiandre käme jabtä akwa, nikwe kuin niedre btä Ngöböye, amne Ngöbökwē mrö mikadi kuin biare kwetadre.

6 Makwe kukwe ye diri ja mräkätre tödekaka Jesubtiye angwane, ma rabadi sribikā kuin Jesukristokwe. Kukwe metre diribare Jesubtä, ye mata mike täte amne ja töitike btä. 7 Akwa kukwe kirakira diän diän amne kukwe mda mda mikanintbe ngwarbe, ye ie makwe ñan olo mika. Akwa makwe dre dre nuendre nūnankrä deme Ngöbö ngwäre-kri, ye jiebtä ma rankwa bäri, 8 ñobtä ñan angwane nita nakwenkä ja mikakäre biare amne dite ngrabare, ye abko kuin bkänä nikrä, akwa nikwe ja mikadre juto nūnankrä kuin deme Ngöbö ngwäre-kri, ye abko bäri ütiäte kri nikrä mtare amne, nūnakäre kärekäre Jesube arato. 9 Aisete kukwe ne abra kukwe era metre abko rabadre era ni jökrä krāke, ie ti tö. 10 Ne mden kisete nita sribire ja di ngöi jökrä Ngöbökrä, ñobtä ñan angwane Ngöbö nire, bti nita tödeke. Niarabko ni jökrä Diantarikä

akwa, niarata nitre tödekaka Jesubti ara jire dentari.

11 Kukwe ne makwe nuemna ja mräkätreye amne makwe diri ietre. 12 Ma abko bati Timoteo, aisete mata dirire angwane, nane ni ruäre tö rabai ma mike ütiäte ñakare jae, akwa makwe blita jame amne nuäre ni mda mdabe. Erere arato, makwe nūna kuin metre, amne makwe ni mda mda tarere. Ye kwrere arato, makwe ja mika ngite ñakare ja mräkätre tödekaka Jesubti okwäbti, ne ngwane mata nüne ño rükadre gare nitre tödekaka Jesubtiye. Angwane ni jökrä tö rabadi nūnai ma kwrere, kākwe nūnandi kore, ne ngwane ma bati akwa, ma rabadi ütiäte ni mda mdakrä. 13 Timoteo ti ngāmi nementa yete angwane, munta gātäre ye kanti makwe ñākä käre Ngöbö Kukweibtä ja mräkätre krāke. Makwe Ngöbö Kukwei nie ietre amne makwe Ngöbö Kukwei diri ietre arato. 14 Ngöbö Üai kākwe ja di biani mae sribi ye nuenkäre, ye abko makwe ñan tuemetre ngwarbe jire chi, akwa yebti makwe sribi janknu. Ngöbö Üai köböire ni mda mda jie ngwianka kākwe kise mikani mabti angwane, kukwe niebare kwetre ma mikakäre biare sribi yekrä. Kä ye ngwane Ngöbö Üaikwe ja di biani mae, ma die mikakäre sribibtä. Ye mden kisete, makwe ñan tuemetre ngwarbe.

15 Kukwe yebtä ma rankwa bäri, ie ti tö. Yebtä makwe sribi bäri mda köbö kwatirekwatire,

mata nüne bāri Ngöbökrä raba-dre gare ni mda mdaye abkokäre. **16** Mata nüne ño, yebtä makwe töbika kuin ja käne amne, kukwe diri makwe, yebtä makwe töbika kuin ja käne arato. Ye erere makwe ja ngibia au ne ngwane, ni kwati ma kukwei nuaka abko Ngöbökwē dianditari siba mabe gwaire.

Timoteokwe ni tōi diandre ño

5 1 Mdakäre abko, ni unsuni-ne unsunine abko kākwe ja mikadre ngite abtä tōi diandre, ye ngwane makwe ñan ngra ngra bti, akwa ni rün nikwe mikata ütiäte jae, ye kwrere makwe ni unsunine unsunine kita nüne bāri Ngöbökrä. Ni bati bati abko ni etba nikwe btä mätrāta, ye kwrere makwe mätrā btäre. **2** Erere arato, ni meye mikata ütiäte ño jae, ye kwrere makwe meri unbren unbren mika ütiäte jae. Ni merire bati bati abko ni ngwai nikwe mikata ütiäte, ye kwrere makwe mika ütiäte. Angwane, makwe ñan ja mika ngite jire chi bentre.

Ni merire merire kån brare krütani die mikadre ño

3 Mdakäre abko, ni merire merire, kån brare krütani, aiseite tä kaibe amne, mräkä ñakare ngibiaka, ye abko nitre tödekaka Jesubti kākwe ngibiadre abko makwe diri kore ietre. **4** Akwa meri kån brare krütani, ye ngäbriänkä btä bränkä tärä, ne ngwane ngibiadre kwetre. Meri ye kākwe niaratre ngibiabare ño,

ye ütiäre ngibiadreta kwetre, ñobtä ñan angwane tuen bāri kuin Ngöböye aiseite.

5 Meri kån brare krütani abko ngibiaka ñakare, akwa tä nüne kaibe era metre abko tä tödeke kwatibe Ngöböbti amne tä blite Ngöböbe dibire rare ja di kärere ie, meri ye kwrere abko die mikadre. **6** Akwa meri mda mda abko kån brare krütani, akwa tä kukwe nuene blo blo kä ngwiankrä nuäre jabtä jirekåbe, meri ye tä nire, akwa ni krütani, kwrere jire tä Ngöbö ngwärekre, ñobtä ñan angwane tä tödeke ñakare Ngöböbti. Meri ye abko ñan die mika. **7** Nitre tödekaka Jesubti btä ñan ñäkäre blo, abkokäre makwe diri kore ietre, **8** ñobtä ñan angwane ni tödekaka Jesubti akwa, ni mräkä jen nikwe, ye nita ngibiare ñakare, ne ngwane nita Ngöbö Kukwei kite temen. Erere arato, nita kukwe nuene bāri käme ni ñakare tödekaka Jesubti ye ngwä, ñobtä ñan angwane ni ñakare tödekaka Jesubti käta mräkä kwekwe ngibiare.

9 Meri kån brare krütani abko tä nüne kaibekaibe abko kä tikadre täräbtä die mikadre abko nere: Meri ie kä gre ketamä (60) mentokwäre, kån brare krütani amne, brare kwe ben nünabare käre kwe amne ñan ja mikani ngite kwe brare mdabe, meri ye abko kä tikadre täräbtä die mikakäre. **10** Meri kån brare krütani-krütani kākwe ngäbriänkä ngibiabare amne ni menteni kata ngäbti kuin kwe amne tä ni

deme deme Ngöbökwē ye ngoto bätete kråke kakäre ngäbti kuin ja gwiriete, meri ye kwrere abko kä tikadre täräbtä die mikakäre. Erere arato, ni ja tare nikaka die mikata kwe amne tä sribi kuin-kuin nuene bätäkä ngwarbe ni mda mdakrä, meri ye kwrere abko kä tikadre täräbtä die mikakäre.

11-12 Akwa meri bāri bati bati abko kä ngämi gre ketamä (60) ie, kån brare krütani amne tä kaibe, ye abko ñan kä tika täräbtä die mikakäre, ñobtä ñan angwane nane niara kä tikadre täräbtä die mikakäre angwane, ñan ja mikadre gure mda niedre kwe Jesuye, abti tö rabadreta ja mikaita gure bobuta, ye ngwane ja kukwei kitadreta temen kwe abtä rabadre ja mika ngite Jesu riüre, aiseite ñan kä tikadre täräbtä die mikakäre. **13** Erere arato, meri bati bati kån brare krütani die mikadre angwane, kä rabadre krene btä angwane, rikadre blite ni mda mdabtä ju kwatirekwatire te. Arato rikadre ja mika kukwe jökräte siba amne kukwe btä ñan blitadre jire abko rikadre kädriere. **14** Mden kisete ni merire merire bati bati, kån brare krütani abko kākwe ja mikata gure, ngäbäre ngibia kwe amne ju ngibia kuin kwe jakrä. Ne kwere meri ye ñan kädriedre blo rüekwe abko ie ti tö. **15** Ye abko, meri bati bati, kån brare krütani namani kaibe abko ruäre kākwe Jesu tuaninametre, käta näin Satana jiebtä.

16 Meri kån brare krütani, ye abko nane nitre tödekaka Jesubti ngätäite mräkä merire tärä kån brare krütani amne tä nüne kaibe, ne ngwane mräkä kwekwe kākwe die mika. Ne kwrere nitre tödekaka Jesubti mda mda rabadre meri mda mda kån brare krütani amne ngibiaka ñakare ye die mika, sribi ñan rabadre kabre dikaro nitre tödekaka Jesubti kråke abkokäre.

Kukwe mda mda nitre jie ngwiankabtä

17 Mdakäre abko, ni ji ngwianka ye tä nitre tödekaka Jesubti jie ngwena kuin ne ngwane, nitre tödekaka Jesubti kwetre raba tare kri amne mika ütiäte kwetre jae. Erere arato, die mika kwetre mröbti amne ngwianbti. Akwa nitre jie ngwianka käta Ngöbö kukwei dirire bāri, ye abko mika bāri ütiäte amne die mikadre mröbti amne ngwianbti abko makwe diridre, ie ti tö. **18** Tita niere kore, ñobtä ñan angwane Ngöbö Kukweita niere krörö: “Buey trigo münantekä, ye munkwe ñan kö kita ngwärebtä,” nieta. Erere arato, “Ni sribikä, ie sribi ütiä biandre,” nieta kore Ngöbö Kukweibtä. Ne mden kisete makwe diri kore nitre jie ngwiankabtä.

19 Mdakäre abko, ni ni Ngöbökwē jie ngwianka käta ja mika ngite abko ni itibe jata niere angwane, makwe ñan kukwe mika era. Akwa ni nibu, ni nimä kākwe kukwe arabe nie mae

angwane, kukwe ka ngäbti makwe. **20** Angwane ni Ngöbö-kwe jie ngwianka mden mden tä ngite, ye ie makwe näkä gätäte nitre Ngöbökwé ye ngwärekre jökrä. Nebtä abko, ni mda mda btä kä jürä rabadre amne, ñan tö ngwiandre ja mikai ngite kwetere abkokäre.

21 Timoteo, Ngöbö btä Kristo Jesu amne angele dianinkä jakrä Ngöbökwé, ye ngwärekre ti bike kukwe ütiäte niere mae, ne erere makwe nuen abko krörö: Ni ma kukwe muko ya, ñakare ya tä sribire ji ngwianka kwrere, akwa nane kukwe raba kwetere makwe ga angwane, makwe tö dian amne makwe die mika ja kwrere jökrä, ie ti tö.

22 Erere arato, makwe ñan kise mika jötrö ngwarbe nibti mikakäre sribire ji ngwianka kwrere, akwa makwe töbika kuin käne niara mikakäre sribire, ñobtä ñan angwane nane makwe ni kukwe kämekäme nuenkä mikadre sribire, yebtä abko kukwe käme nükebti mae siba nütü rabadre mabtä. Makwe ja ngibia kuin deme kukwe kämekäme ngäniene.

23 Timoteo, ma ngirie abko neme bren käre. Erere arato, bren mda mda tä neme mabtä. Ye kräke abko, makwe uba döi kwaka ña kiakia angwane, makwe ñan ñö aibe ña abko ti tö niei mae.

24 Nitre tödekaka Jesubti abko ruäre käta kukwe nuene käme, mika ngämi ja ngwärekre, känenkre tärä neme gare ni

jökräye; akwa ni ruäre abko tä kukwe nuene kämekäme mikata ja ngwärekre amne batibe neme gare. **25** Ne kwrere arato, ni ruäre tä jändrän kuinkuin nuene abko tä neme gare ni jökräye; akwa ni ruäre abko tä jändrän kuinkuin nuene tiebe abko gare ñakare. Abti kira erere angwane, tä niken neme gare ni jökräye. Ne mdenbtä abko, makwe töbika kuin ja käne abko ti tö nie mae Timoteo.

Nitre klabore käkwe sribidre ño bkänkäkrä

6 **1** Mdakäre abko, nire nire abko tä klabore ni mdakwe, ruäre abko tä ja tare nike, akwa bkänkä kukwei mika ütiäte kwetere jae, niarakwe ñan ñäkädre blo Ngöbö rüere amne kukwe dirita nunkwe ye rüere abkokäre. **2** Akwa nane ni klabore ye bkänkä käta tödeke Jesubti arato ne ngwane, ñan bkänkä mikadre ngwarbe kwe jae, ñobtä ñan angwane niara ja mräkäre Jesu käbti arato. Akwa bäri sribi kuin kwe bkänkäkrä, ñobtä ñan angwane tä niaratre mräkä Jesu käbti die mike amne tä tare kri kwe arato aiseite. Kukwe ne abko makwe diri amne nuemna nitre klabore tödekaka Jesubti yeye.

Kukwe blo dirikätre tä nüne ño

3 Nire nire käta kukwe dirire blo amne kukwe diribare era metre ni Dänkien Jesukristokwe, ye tä kaen ngäbti ñakare, erere arato kukwe dirita era metre

Ngöböbtä, ye tä kaen ngäbti ñakare, **4** ni ye abko töi ñakare, akwa tö bikabtä kri. Ye mden abko jatadi dirire bä jene abko krörö: Niara töta neme ja kwetäri bäri kabre krübäte ni jökräbe kukwe ngwarbebtä. Ye mden kanti ni ruäre töta neme ja tuai ni mda kwrere, abtä tä bätä ngwen ni mdabtä jändrän dokwäre. Ne mdenbtä ni ruäre motota neme romon jakrä kwäri-kwäri amne näkäta niken diän diän jae kwärikwäri ja kukwe ñan mikata niken era jae kwäri-kwäri. **5** Erere arato, ni ye tä niken rüre käre jabe kwärikwäri. Ni ye abko töi käme, aiseite kukwe era metre Jesubtä dianinkä niaratrekän. Ngöböta nitre tödekaka Jesubti die mike ngwian ganantä nieta kwetere, aiseite tä bike nüne metre ngwian diankrä jae.

6 Era metre Ngöböta nitre tödekaka Jesubti die mike, akwa nita nüne metre Ngöbö ngwärekre amne jändrän ño ño tä nikwe, ye käi tätre nuäre nibtä, ye abko bäri ütiäte **7** ñobtä ñan angwane ni därebare angwane, ni därebare bütiere, jändrän ñakare nikwe. Erere arato, ni krütadi angwane, ni ñan rikadre jändrän ngwena jire chi jabe. **8** Ne mden aiseite, mrö tärä kwetadre nie amne dän amne ju tärä nikwe, ye abko käi rabadre nuäre nibtä.

9 Ye abko käi rabadre nuäre nibtä, ñobtä ñan angwane ni mda abko jändrän ye tärä kwetere akwa, töta nebe rabai ngwian

btä jändrän bkäne bäri kabre abko tä niken ja mike ngite. Erere arato, tätre niken ja dokwä mike kö okwä Satanakwete. Erere arato, jändrän bätäkä ngwarbe ye mdei tä neme ietre, ye käta kukwe taretare ngwena kräke amne mrä tä ni se juen ngwarbe. **10** Kukwe tä nakenkä kore ni yebtä, ñobtä ñan angwane nita ngwian tarere, ye abko tä niken ni mike kukwe nuene blo blo ngwian diankrä jae. Ni ruäre töi kore abko käkwe Jesu kukwei tuanimetre, abkokanti tä ja tare nike kri mtare.

Pablota Timoteo tö den mrä

11 Akwa ma abko ni Ngöbökwé, aiseite ma gitia kukwe käme jökrä ye ngäniene amne nuna era metre Ngöbö ngwärekre, yebtä makwe ja kita. Nuna Ngöbökrä amne tödeka Ngöböbti jändrän jökräbtä, ye jiebtä ma rankwa. Erere arato, ni mda mda taredre, ye jiebtä ma rankwa angwane, makwe nünanka dite tödekabtä Jesubti. Erere arato, makwe blita ja moto jämenbti ni mda mdabe.

12 Makwe tödekadre käre Ngöböbti, yebtä makwe nünanka dite jabtä rükäre kukwe kämekäme rüere. Makwe ja töi mikaba kwatibe Ngöböbtä angwane, makwe nieba ni kwati ngwärekre, ye ngwane Ngöbökwé ma käräbare nüne kärekäre jabe, aiseite makwe nünandre kärekäre Ngöböbe, ye makwe ketate dime kisete jakrä, ie ti tö Timoteo.

13 Mtare Ngöbö jändrän jökrä mikaka nire, ye ngwäreki amne, Kristo Jesu btä kä jürä namani ñakare, käkwe ja niebare metre Poncio Pilatoye, Kristo Jesu ye ngwäreki ti tö niei krörö mae Timoteo: 14 Jesukristo rükadita, ye känenkri niara kukwei mika täte jökrä makwe. Erere arato, makwe nünandre ño, ie niara tö, ye kwrere makwe nuna niara ngibiare ngäbti kwärä. 15 Ngöbö tö rabai Jesukristo juenta ñongwane, erere juandita kwe angwane, niara rükadita. Ngöbö aibe gobran kri. Niara aibehtä käita neme nuäre metre. Erere arato, Ngöbö abko Jrei kri, jrei jire jökrä kä nebtä bti ta amne niara abko tä Dänkiene dänkin jökrä kä nebtä yebti ta. 16 Ngöbö aibe därebare ñakare amne krüte ñakare. Niarata nüne kärekäre, ñotra trä ngwen bürere te tä nüne. Ye kanti ni ñakare raba neme ja ken ben. Ni kä nebtä käkwe ñan Ngöbö tuabare gwä-rere amne Ngöbö ñan tuare nikrä arato. Ngöbö aibe raba ütiäte ni jökrä kräke kärekäre amne niara aibe di kri. Abko kore se.

17 Timoteo, ni ngwian bkänkä krikri, ye abko käkwe ñan bika kri amne, ñan ngwian kabre kwetre, yebti tödeka kwetre, makwe nie ietre, ñobtä ñan

angwane ngwian tä niken ngwarbe jötrö amne, ni ñan raba ngibiare kärekäre. Akwa Ngöbö abko käta jändrän kuin bien kabre nie, kä mikakrä juto nibtä. Yebtä ni ngwian bkänkä krikri käkwe tödeka Ngöböbti, makwe nie ietre. 18 Mdakäre abko, ni ngwian bkänkä krikri ye käkwe ñan ja mika kábäre, amne jändrän kuin nuen kabre kwe ni mda mdakrä ngwian kwetre yebti. 19 Nünandre kore kwetre angwane, rabadi jändrän kuin bkäne kabre kä käinbti amne rabadi nüne kärekäre Ngöböbe, makwe nie kore ietre Timoteo.

20 Timoteo, kukwe kuin Jesukristobtä mikani gare mae, ye makwe ngibia kuin jakrä. Erere arato, kukwe ngwarbe diän dian ütiäte ñakare, ye makwe ñan ja olo mika ie. Mdakäre abko, nitre ruäre tätre dirire blo, akwa tä dirire kuin era metre tä nütüre au jabtä, akwa dirita blo kwetre. Ni dirikä blo ye kwrere abko, ben makwe ñan ja geta jire chi, 21 ñobtä ñan angwane ni ruäre käkwe kukwe blo ye mikani ütiäte jae, aisete tä Jesu mike ütiäte ñakare mtare amne nika-ni dikekä Ngöböbti mento.

Ngöbö raba ja moto mike kuin makrä. Abko kore se. Ne ngörä.

Tärä Tikani Bobukäre Pablokwe Timoteokrä 2 Timoteo

Pablo nämane ngite kä teri juta Romate, bti kä 62-63 angwane tika, ninteta. Yebti niara nikaninta bäbkäkäre kukwe kuin Jesubtä ngwente kä ngrabare temen. Angwane tärä tikani kena kwe Timoteoye amne Titoye. Yebti kä 66-67 näre angwane, Nero namani gobrane emperador kwrere angwane, Pablo kitaninta ngite bobukäre kwe. Pablo namaninta ngite angwane, tärä ne tikani kwe Timoteoye. Kä ye angwane, Pablo mikani ngite bä jene, ñobtä ñan angwane käne niara nämane ngite gwi ja juete. Akwa kitani ngite bobukäre angwane, kä käme amne kä tibo kanti kitani ngite. Erere arato, Pablo mäkäninte kadenanbti. Nete Pablokwe sribibare mrä amne müre ketadi abko namani gare ie, aisete kukwe tikani krörö kwe Timoteoye:

Bäri käne abko ja namani ruen kaibe Pabloye, abtä namani ulire, ñobtä ñan angwane niara kukwe muko Figelo amne Hermógenes käkwe kä mikaninkä btä. Erere arato, Demas amne ni mda mda käkwe kä mikaninkä btä, aisete Timoteo jatadre niara die mike, ie niara tö namani.

Bobukäre abko, nitre tödekaka Jesubti namani ja tare nike emperador Nero kisete. Yebtä abko, Pablo namani töbike kri, käkwe Timoteo töi diani nünenkä dite jabtä kukwe Jesukwe yebtä. Erere arato, Timoteo käkwe kukwe kuin ye diridre janknu, niebare kwe ie. Mdakäre abko, Timoteo tädre biare ja tare nikakäre kukwe kuin Jesubtä ye dokwäre, niebare Pablokwe.

Nikwe nünandre ño metre Jesu kräke abko tärä ne tä niere nie. Erere arato, ni rabadre juto biare ja tare nikakäre tödekabtä Jesubti abko tärä ne tä niere nie. Tärä ne abko tikani mrä Pablokwe nütüta.

Pablota köbö ngwentari Timoteoye

1 1 Ti Pablo käta tärä ne tike mae Timoteo. Ja töi jenbti, Ngöbökwé ti mikani Kristo Jesu kukwei ngwianka. Ni rabadre nüne kärekäre Ngöböbe Kristo

Jesu köböire, niebare kira Ngöbökwé, ye mden abko tita niekäre mtare ni jökräye.

2 Timoteo, ma ti ngobo jen tikwe kwrere. Ma tare kri tikwe. Ngöbö ni Rün nikwe btä Kristo Jesu ni Dänkien käkwe ja moto mika kuin makrä. Erere arato, ma raba

ruentari tare ietre amne, makwe nūna jāme niaratre diebti abko ie ti tō Timoteo.

Pablokwe ja di kārābare Ngōböye Timoteokrā

3 Timoteo, ti mrākātre kirakira kākwe sribibare era metre Ngōbökrā, ye kwrere tita sribire krāke amne, ja ruen ngite űakare tie Ngōbö ngwārekri. Tita blite dibire rare Ngōböbe angwane, mata nūketa tōre tie angwane, tita kuin niere ie makrā. 4 Ti jataba yāketa angwane, ma rababa ti müaire, ma okwā űōi rababa nimiente ti okwābti, ye tā nūketa tōre tie amne, ti tōta neme ma tuaita jōtrō, kā ngwiankāreta nuāre jabtā. 5 Mata tōdeke kwatibe Ngōböbti, ye tā nūketa tōre tie arato Timoteo. Timoteo, ma mōlōi Loida btā ma meye Eunice kākwe tōdekani kwatibe Ngōböbti kāne, ne kwrere arato mata tōdeke kwatibe bti gare kuin tie.

Timoteokwe űan Jesu gaidre

6 Mata tōdeke kwatibe Jesubti, aisete ti tō kukwe ngwiain tōreta krōrō mae: Tikwe kise mikaba mabti sribi mikakāre ma kisete angwane, Ngōbökwē ja di biāni mae sribi jakwe nuenkrā. Ngōbö di ye abko makwe mika bāri űtiāte jae abko tita niere mae, 7 űōbtā űan angwane Ngōbökwē ja űai biāni nie, ni die mikakāre nūne dite niarakrā amne, ni mda mda tarekāre, ere-re arato tōbikakāre kuin ja kāne. Ngōbö űan tā ni mika kā jūrā ngwen jabtā.

8 Ne aisete ma űan raba ja gaire jire chi blitakāre ni Dānkienbtā. Erere arato, tita ngite ni Dānkien Jesukristo kukwei diribtā, nebtā ma űan raba ja gaire, akwa kukwe kuin Jesukristobtā, ye krāke makwe ja tare nikadre tibe gwaire Ngōbö diebti. 9 Ngōbö kākwe ni dianintari amne ni kārābare nūnakāre deme kwe. Ne űan nikwe jāndrān kuin nuenbare abko űtiāre Ngōbökwē ni dianintari, akwa kira Ngōbö ngāmi kā ne dātere, kānenkri niarakwe ni tarebare ja moto kuinbti angwane, ja tōi jenbti kukwe mikanintbe au kwe, kukwe kuin nuene ni krāke Jesukristo kōböire. 10 Ngōbökwē kukwe mikanintbe kore, mden abko bā mikanina kwe nie. Kristo Jesu ni Diantarikā nūkani kā nebtā angwane, kukwe mikanintbe kira Ngōbökwē nūkani gare nie. Kristo Jesu kākwe gata die juani ngwarbe. Erere arato, ni rabadre nūne kārekāre Ngōböbe, ye abko mikani gare kwe nie kukwe kuin jabtā ye kōböire.

11 Kukwe kuin Jesubtā, tita tike mae, ne mden abko Ngōbökwē ti mikani kādriere ni kwatibe. Erere arato, ti mikani kukwe kuin ye ngwianka kwe amne, ti mikani kukwe kuin ye dirikā kwe arato. 12 Ne mdenbtā abko, tita ja tare nika mtare, akwa yebtā ti ja gaire űakare, űōbtā űan angwane ni gare kuin tie, bti tita tōdeke. Jesukristo di kri bti tita tōdeke, aisete niara jatadita, ye ngābti abko ti ngibiadi kuin kwe űo tikwe ribebare ie ye kwrere.

13 Timoteo, ma rabadre dirire metre, abkokāre tikwe kukwe diribare űo űo, ye kwrere makwe diri. Angwane makwe tōdekadre kwatibe Kristo Jesubti amne, makwe ni mda mda taredre.

14 Kukwe kuin era metre Jesubtā mata dirire, yebti abko makwe kukwe ngwarbe ngwarbe krai. Ngōbö űai Deme tā nūne nibtā abko diebti makwe kukwe ngwarbe krai.

15 Mdakāre abko, ti kani ngite angwane, nitre Asiabo nūnanka Roma nete kāta tōdeke Jesubti, ye kākwe kā mikaninkā jōkrā tibtā. Erere arato, nuenbare Figelokwe amne Hermōgene-kwe tibtā abko garera mae.

16 Ti nāmane ngite, akwa Onesiforo abko rababa ti gaire űakare amne, batire batire rababa nūke ti moto mika nuāre nete. Niara ye abko ni Dānkien ie raba ruentari tare tikrā nāre. 17 Onesiforo nāmane Roma nete angwane, namani ti kānenentari kisere, namani jadūke űakare abti ti kwantariba ie. 18 Amne ni nāmane Efeso angwane, ni die mikaba kri kwe. Ye tā tōre kuin mae ruen tie Timoteo. Ye abko, ni Dānkien Kristo Jesu rūkadita, ye ngwane Onesiforo raba ruentari tare ie abko ie ti tō.

Timoteokwe nūnandreka dite jabtā ja tare nikakāre Jesu dokwāre

2 1 Timoteo ma abko ti ngobotikwe kwrere. Kristo Jesu tā ni tarere ja moto kuinbti, ye diebti makwe nūnanka dite, ie ti tō.

2 Erere arato, tikwe diribare ni kwati okwābti angwane, makwe ti kukwei nuani, ye abko nire nire bti tōdekadre amne rabadre Ngōbö kukwei dirire kuin, raba tuen mae, ye ie makwe kukwe ye dirita, niaratre kākwe diridreta ni mda mdaye ja tāritāri abkokāre.

3 Timoteo, ma abko rūkā Kristo Jesukwe, aisete ni rūkā tā biare ja tare nika, ye kwrere ma raba ja tare nika tibe tōdekabti Jesubti angwane, makwe nūnanka dite Jesukrā. 4 Nitre rūkā kuinquin tā ja kite űakare jāndrān mda mdabtā kā mikakāre nuāre dānkienbtā, ye kwrere makwe űan ja kita jāndrān mda mdabtā amne, sribi Kristo Jesukwe aibebtā makwe ja kita, kā mikakāre nuāre btā. 5 Erere arato, nitre jadakaka abko krāke kukweta űkaninte jadakakrā metre, akwa kukwe ye mikata űakare tāte ne ngwane, űan tā ganane, aisete korona bianta űakare ietre. Akwa nitre jadakaka tā kukwe mika tāte, kōböire tā ganane angwane, korona bianta ie mikakāre űtiāte. Ye kwrere Ngōbökwē kukwe űkaninte, ere-re mata nuene, kōböire Ngōbökwē korona biāndi mae. 6 Erere arato, ni sribikā tirete kāta sribire tare krūbāte, aisete nura űta nāire, niara ara jire, ie biandre kāne. Ye kwrere Ngōbökwē jāndrān kuin biandre mae, abkokāre makwe sribi ja di ngōibti Kristo Jesukrā. 7 Timoteo, tita kukwe ketamā bā mika mae sribi Jesukristokwebtā, nebtā makwe



Pablo näire korona ne kwrere ganain
nämäne (2 Timoteo 2:5)

töbika käre angwane, ni Dänkien
käkwe mikadi gare jökrä mae
abko gare tie.

8 Erere arato, kukwe krörö
ne makwe ngwian töre käre jae:
Jesukristo krütani, abti Ngöbö-
kwe mikaninta nire. Niara abko
jatani jrei David tukwe mräkä-
kri. Kukwe ye abko kukwe kuin
Jesukristobtä mikata gare tikwe.
9 Ye mden dokwäre tita ja tare
nike kri amne ni ja mikaka ngi-
te kri mäkäteta kadenante,
kwrere jire tita mäkäninte kade-
nante; akwa Ngöbö kukwei
abko ñan tä mäkäninte kade-
nante, ñobtä ñan angwane ni
kwati tä kädriere. 10 Ye mden
kisete tita ja tare nike bätäkä
ngwarbe. Ni dianinkä jakrä
Ngöbökwé abko rabadre dianin-
tari jökrä Kristo Jesukwe amne
rabadre nüne käre käre kä

nuärete, abkokäre tita ja tare
nike bätäkä ngwarbe.

11 Kukwe ne abra kukwe era
metre abko rabadre era ni jökrä
kräke:

Nikwe tödekani Jesubti
angwane, ni krütani ben,
ye kwrere arato nikwe
nünandi ben.

12 Nikwe nünandrekä dite
jabtä ja tare nikakäre
niara dokwäre,
ne ngwane niarakwe
gobrandi, kanti nikwe
gobrandi siba ben.

Akwa nikwe niara
rükandrete ne ngwane,
ni rükandite kwe arato.

13 Nikwe Jesukristo
gibiarekätä akwa,
niara abko käkwe ja
kukwei mikadi täte käre,
ñobtä ñan angwane niara
abko ñan raba ja kukwei
kite temen.

**Sribikä kuinkuin tä sribire ño
abko Pablokwe niebare**

14 Timoteo, nitre dirikä mda
mda käkwe ñan ja kwetadre
kukwe ngwarbe ngwarbebtä,
tikwe nieba, erere makwe nieta
ietre Ngöbö okwäbti abko erere
nuendre kwetere, makwe nie ietre
janknu, ñobtä ñan angwane ja
kwetata ngwarbe, ye abko tä ni
die mike ñakare amne, tä ni
kukwe nuaka nuaka ngwianta
Jesu gibiekätä, aisete ñan ja
kwetadre abko makwe nie metre
ietre. 15 Erere arato, ni sribikä
ütiäte Ngöbökwé käta Ngöbö
kukwei metre Jesubtä dirire

metre ta, abtä sribi gaire ñakare,
ye kwrere ja di ngöibti makwe
Ngöbö kukwei diri metre angwa-
ne, ma ñan raba sribi gaire Ngö-
bö ngwärekwé Timoteo.

16 Kukwe ngwarbe diän diän
ütiäte ñakare, yebtä makwe ñan
ja kita, ñobtä ñan angwane ni
ñäke ngwarbe kore abko käre tä
niken kukwe nuene bäri kämekä-
me mda. 17 Erere arato, kukwe
dirita kwetere ye tä niken niren ni
kwati ngätäite abti mrä ni kwati-
ta näin kukwe ngwarbe jiebti. Ye
mden kwrere abko dirita Hime-
neokwe amne Filetokwe.

18 Kukwe era metre Jesubtä diri-
ta ñakare kwetere. Ni krütani
rükadreta nire abko erere nama-
nina bare, tätre niere, ye käta ni
ruäre mike Jesukristo gibiekätä.
19 Akwa nitre tödekaka metre
Jesubti abko ñan Jesu gibiaikätä,
ñobtä ñan angwane nitre tödeka-
ka Jesubti abko ürä kwrere. Ürä
nökata kuin nguse angwane, ñan
tä juen ngitiekä, aisete juta neme
dite. Ye kwrere jire ni tödekaka
metre Jesubti tä mikani Ngöbö-
kwe abko btä kukweta tikani
krörö: “Ni jen Ngöbökwé erere
gare jökrä Ngöböye” amne, “Ni
jökrä käta ja di kärere ni Dän-
kien Ngöböye, ye käta kukwe
kämekäme kite temen,” abko tä
tikani kore btätre. Nebtä Ngöbö-
ta ni jen kwe metre ngibiare
kuin ñan Jesu gibiadrekätä abko
tä gare nie.

20 Kukwe nebtä abko, ti bike
kukwe mda bä mike mae Timo-
teo abko krörö: Ni jändrän bkän-
kä kri gwiriete ñan oro btä plata

dätebare blatore amne basore
aibe tä kwe amne, kri kukwän
btä dobro дәtebare blatore amne
basore tä kwe arato. Akwa jän-
drän kuin orore btä platare abko
tä ni ütiäte ütiäte kakrä ngäbti
amne, kri kukwän btä dobro sri-
bebare blatore amne basore, ye
abko tä sribi ngwarbe ngwarbe-
krä gwita. 21 Ye kwrere abko,
nitre tödekaka Jesubti käkwe ja
ngibiadre kuin deme nitre dirikä
ngwarbe ngwarbe ngäniene ne
ngwane, jändrän kuin ütiäte ye
kwrere jire ni rabadi Ngöbö
ngwärekwé amne, ni mikadi kuin
deme ni Dänkienkwe, sribi kuin-
kuin bätäkä ngwarbe nuenkäre
jakrä.

22 Timoteo jändrän kämekä-
me mdei tä krübäte ni bati batiye
abko ngäniene ma gitia. Akwa
nuna metre Ngöbökrä, yebtä
makwe ja kita amne tödeka kwa-
tibe Ngöböbti amne ja taredre
kwärikwäri, amne nuna jäme, ye
jiebti ma rankwa bäri nitre töi
deme deme käta blite Ngöböbe
yebe gwaire abko ie ti tö Timo-
teo. 23 Erere arato, kukwe ngwa-
rbe, btä ja kwetata niken
kwärikwäri, yebtä ni kwati tä
niken neme romon jakrä abko
garera mae, aisete kukwe ye
kwrere btä makwe ñan ja kweta
siba. 24 Ye abko, ni sribikä ni
Dänkienkwe abko ñan tädre ja
kwete ni mda mdabe, akwa ni
dirikä ye abko tädre ja gete jäme
ni jökräbe. Arato rabadre Ngöbö
kukwei dirire kuin. Erere arato,
ñan moto rabadre romon ja
dokwäre. 25 Ja moto kuinbti,

niarakwe niara rüe tõi diandre, ñobtä ñan angwane nane Ngöbö-kwe nitre ye tõi kwitadre angwane, kukwe käme kitadre temen kwetre amne kukwe metre Jesubtä rükadre gare ietre. 26 Angwane diablukwe niaratre kani ngite ja mikakäre täte ye gadre kwetre jabtä amne jatadre tödeke Jesubti, abkokäre tõi diandre kore Timoteo.

Kä mrä angwane ni kwati rabadi nüne Ngöbö rüere

3 1 Timoteo, kukwe mda rabadre gare mae abko krörö: Kä mrä angwane, kukwe rabadi nakenkä taretare krübäte, 2 ñobtä ñan angwane ni kwati rabadi ja tarere kaibe au, amne rabadi ngwian tarere bäri. Erere arato, ni kwati rabadi ja käikitekä au amne rabadi bike kri ni mda mdabtä. Ni kwati käkwe ñäkädi diän diän gwärere ni mda mdaye amne, rün btä meye ñan kukwei mikadi täte kwetre. Ni mdakwe jändrän kuinkuin nuen-di kräke akwa, ye rabadi tuen ütiäte ñakare ietre amne, Ngöbö rabadi ütiäte ñakare kräke arato. 3 Erere arato, ni kwati ñan rabadi ni mda mda tarere jire chi amne, kukwe nuenbare rüere, ye abko ñan diandi jabtä ta kwetre. Erere arato, rabadi blite ngwarbe ni mda mda rüere, tö rabadi kukwe kämekäme nuene bätäkä ngwarbe, erere rabadi nuene jökrä, ñobtä ñan angwane ñan rabadi ja tõi ketebtä. Erere arato, rabadi kukwe nuene blo ni mda mdabtä abko käi rabadi juto

btätre, akwa jändrän kuin rabadi tuen käme ietre. 4 Erere arato, rabadi kukwe muko kwekwe kite ngite ngwarbe, kä jürä rabadi ñakare btä kukwe kämekäme nuene. Rabaditre bike bäri krikri ni mda mdabtä, tö rabadi kä ngwen nuäre jabtä, akwa Ngöbö taredi ñakare kwetre. 5 Nitre tödekaka era metre Jesubti, kwrere jire ja bä mikadi kwetre akwa, täditre kukwe nuene kämekäme, yebtä abko Ngöbö di kri mikadi ngwarbe kwetre. Ne mden kisete, kä mrä angwane kukwe jatadi nakenkä tare krübäte kore.

Timoteo, ni tõi kämekäme ye kwrere ben makwe ñan tö ngwian ja gete jire, 6 ñobtä ñan angwane ni ye kwrere abko tä niken ni ngökakäre ju kwatire-kwatire te kwäräkwärä, käta meri töbike ñakare ja käne ngökö jae. Ne abko raba nuene ñobtä ñan angwane meri ye abko ie jata neme ruen ngite krübäte Ngöbö ngwärekre amne, käre tä kä kwitekwite jabtä. 7 Meri ye kwrere käre tätre ja töitike Ngöbö kukweibtä akwa, kukwe diribare blo Ngöböbtä, yebtä tätre ja töitike, aisetö tödekadre era metre Jesubti abko ñan tä nuke gare jire chi ietre. 8 Nitre kukwe dirikä blo ye käre tä ja mike kukwe metre Jesubtä rüere, sukia nibu kädian nämane Janes btä Jambres namani Moisés rüere ye kwrere. Nitre ye töita ngwarbe kukwe kämekäme aibe-btä amne tä tödeke ñakare mda Ngöböbti. 9 Akwa ni nibu

namani Moisés rüere, btä kukwe nakaninkä ño, ye kwrere rakadi-kä nitre tõi kämekäme btä, ñobtä ñan angwane tõi ñakare, ye abko gadi ni jökräkwetö btätre amne, ni kwati ñan rabadi nekete mda niaratrebe, ye raba gare mae Timoteo.

Pablokwe Timoteo tõi diani

10 Akwa tikwe kukwe diribare mae amne, tikwe nünabare ño, ye garera mae. Erere arato drekäre ti nämane nüne kore amne, ti nämane tödeke ño Jesubti garera mae, amne ti nämane nebe romon ñakare jötrö garera mae. Erere arato, ti nämane ni mda tarere ño amne, ti nämane nünenkä dite ja tare nikakäre tödekabtä Jesubti ño garera mae. 11 Erere arato, tikwe ja tare nikani jakän garera mae amne, juta Antioquíate amne juta Iconiote, erere arato juta Listrate tikwe ja tare nikani kri tödekabtä Jesubti abko garera mae. Tikwe ja tare nikani kri, akwa ti Dänkien Jesukristo käkwe ti dianinkä ti rüe kisete, ye abko garera mae arato. 12 Ye abko, nire nire tö nünai kuin deme Kristo Jesukrä abko käkwe ja tare nikadi rüe kisete. Ne abko kukwe era tita niere mae Timoteo. 13 Akwa ni moto kämekäme, ni ngökaka abko näin kukwe nuene bäri kämekäme mda. Niaratre näin ni ngökö bäri amne, niaratre ngökadi krübäte ni mda mdakwe. Ne abko rabadi nakenkä kore ja täritäri.

14-15 Ngöbö Kukwei brende-bare makwe, ye abko makwe mika täte amne mika ütiäte janknu makwe, ñobtä ñan angwane ni Ngöbö Kukwei dirikä mae abko ni ütiäte garera metre mae. Erere arato, ma nämane chi ngäbäkrere angwane, Ngöbö Kukwei deme ye namanina gare mae, aisetö makwe mika täte janknu. Nita tödeke Jesukristobti angwane, Ngöböta ni dentari, yebtä abko Ngöbö Kukwei tä ni mike töbtä. 16 Ngöbö Kukwei jökrä abko Ngöbökwetö mikani gare metre nitre täre tikakaye, aisetö kukwe ütiäte dirikä amne kuin mäträkrä amne, kuin ni mda tõi diankrä amne, kuin ni töitikakrä nüne metre Ngöbö ngwärekre. 17 Ne köböire abko nitre tödekaka Jesubti tä nüne Ngöbökrä ye tädre juto biare sribi kuinkuin bätäkä ngwarbe nuenkrä.

4 1 Timoteo, Kristo Jesu rükadita kritobore ni nire kräke amne ni krütanina kräke. Erere arato rükadita gobrane. Ngöbö ngwärekre amne Kristo Jesu ye mden ngwärekre tita niere krörö mae: 2 Makwe Ngöbö Kukwei nie ni mda mdaye. Ni mda mda tö raba ma kukwei nuai ya, ñakare ya, akwa ma raba juto biare Ngöbö kukwei niekrä. Amne ni mda tö dian makwe, amne makwe mäträ ni mda mdabtä. Erere arato, makwe ni mda mda kita nüne bäri Jesukrä amne, makwe diri metre ta ja moto jämenbti ietre abko tita niere mae. 3 Makwe nuendre,

ñobtä ñan angwane kä jatadi angwane, ni kwati ñan tö rabadi kukwe era Ngöböbtä ye kukwei nuai aisete. Kukwe ño ño niaratre tö rabadi kukwei nuai, ye erere kräke dirikätre ngwarbe ngwarbe kändädi kwati kwetre dirikäre jae ja mikakrä nuäre. **4** Erere arato, Ngöbö kukwei era metre abko btä rabaditre kä mihakä amne kukwe mikanintbe ngwarbe kirakira ñakare era, ye aibehtä rabaditre ja däkweite. **5** Akwa ma abko, käre makwe töbika kuin metre ja käne amne makwe nünanka dite jabtä ja tare nika näire. Erere arato, ni mda mda, ie kukwe kuin Jesubtä gare ñakare abko ietre makwe mika gare amne sribi ño ño nuendre, ye makwe nuen kuin jökrä.

6 Ye abko makwe nuendre, ñobtä ñan angwane ti abko müre keta kebera Jesu mikabtä täte, aisete ti kebera krüte jakän. **7** Ni rükä käta rüre kuin, ye kwrere jire tikwe ja di mikani sribikäre kuin Jesukrä. Sribi jökrä biani nuendre tie ti Dänkienkwe, ye abko tikwe nuenbarrera jökrä amne tikwe ja töi mikani kwatibe Jesubtä, abti kä nüke mtare tie. **8** Ye mden kiseti, ti krütadi angwane, ti Dänkien Jesu, Kritobo metre, käkwe sribi ütiä biandi kuin tie, käkwe ti mikadi kuin era metre. Ne ñan ti aibe ie, sribi ütiä biandi kwe amne, ni jökrä käta Jesu ngibiare kisere abko ie sribi ütiä biandi kwe amne mikadi kuin metre kwe arato.

Pablota jändrän kärere mrä Timoteoye

9 Timoteo, ma jata jötrö ti kanti nete ja tuakäreta tibe, ie ti tö, **10** ñobtä ñan angwane Demas nämane tibe nete akwa, jändrän kä nebtä nämane tare bäri kwe, aisete kä mikaninkä kwe tibtä, nikani juta Tesalónicate. Crescente abko nikani kä Galaciate amne Tito abko nikani kä Dalmaciate. **11** Aisete Lucas aibe tä tibe nete. Timoteo, ma jata angwane, makwe Marcos ngwian siba jabe; ben ma jata, ñobtä ñan angwane Marcokwe ti die mikadre kri sribi Ngöbökwetä nete ruen tie, aisete ma jata ben. **12** Tíquico abko tikwe juani juta Efesote. **13** Timoteo, ma jata angwane, dän ngetbo kä tibo kriere mikateba tikwe juta Troate, Carpo kanti, ye ma jata ngwena tikrä. Erere arato, täräta mikaninte ruäre tikwe, ye ma jata ngwena tikrä amne, kabra btä obeja kwata sribebare täräre täräre tä mikaninte tikwe yete, ye ma jata ngwena jökrä tikrä, ie ti tö bäri.

14 Alejandro abko sribikä jändrän jierobtä, ye abko käkwe kukwe nuenbare käme krübäte ti rüere abko dokwäre ti Dänkien Jesukwe mikadi ja ngie nuen. **15** Mden kiseti makwe mokre jabtä Alejandro yebe arato, ñobtä ñan angwane kukwe kuinkuin Jesukristobtä dirita nikwe, ye rüere niarata rüre krübäte.

16 Timoteo, ti järeababa kena kritobo romanobo ngwärekrei

angwane, ti mräkätäre tödekaka Jesubti käkwe kä mikakaba jökrä tibtä, aisete ni rababa ñakare mda ja kwetaka ti dokwäre. Akwa Ngöbökwé ñan ti mräkätäre mika ja ngie nuen näire. **17** Ti mräkätäre tödekaka Jesubti käkwe ti mikateba kai-be, akwa ti Dänkien Jesukwe ja di bianba tie, nitre ñakare israelitare tödekaka ñakare Jesubti nämä yete, ye olote Jesu kukwei kuin ni diantarikrä abko ti rabadre kädriere abkokäre. Ye ngwane ti Dänkien Jesu käkwe ti ükaba gata ngäniene, aisete ye näire ti rüekwe ti müre ketaba ñakare. **18** Ne kwrere ti Dänkien Jesukwe ti ükadi käre jändrän kämekäme ngäniene. Abti tä gobrane kä käinbti, ye kanti näin ti ngwena nüne jabe.

Ni Dänkien Jesu aibe käikita-drekä kärekäre ni jökräkwe. Abko kore se. Amen.

19 Timoteo, tita köbö kuin juen Priscilakrä, Aquilakrä amne Onesíforo mräkäkrä, ye makwe nie ietre tikrä. **20** Erasto abko rababa juta Corintote amne Trófimo abko rababa bren, abtä tikwe mikateba juta Miletote. **21** Timoteo, kä nüre amne kä tibo, känenkri ma jata jötrö ti kanti nete, ie ti tö. Arato ni mräkä tödekaka Jesubti Eubulo, Pudente, Lino, Claudia btä ni mräkä mda mda juta Roma nete käta köbö kuin juen makrä.

22 Ni Dänkien Jesukristo raba mabe amne Ngöbö raba ja moto mike kuin mun jökrä kräke. Abko kore se. Ne ngörä.

Tärä Tikani Pablokwe Titokrä Tito

Pablo nämane ngite kä teri juta Romate, tikaninteta angwane, tärä ne tikani kwe Titoye. Kä 63-65 angwane, Pablokwe tärä ne tikani. Titokwe kukwe kuin Jesubtä mikani era Pablo köböire gare nie. Abti Tito namani sribikä siba Pablobe Timoteo kwrere.

Pablo nämane ngite, yebti tikaninteta kena angwane, niara btä Tito käkwe sribibare Cretate. Yebti Pablo nikani kä mdabti angwane, Tito mikaninte sribire ja täte kwe.

Mren Mediterráneote, kä butu krikri nämane ketabkä. Ne mden ketati kädianta Creta. Tito amne Pablo näire ni Cretabo kwati namani nüne käme krübäte.

Ye angwane abko, ni ño diandrekä sribikäre ni nitre tödekaka Jesubti jie ngwianka amne ni nitre jie ngwianka die mikaka kwrere abkobtä Pablokwe tärä ne tikani Titoye, niara töi diankäre. Erere arato, nitre nämane ja mike kukwe kuin Jesubtä rüere ye abko kukwe ötadere ño, abkobtä Pablokwe töi diani.

Mdakäre abko, dirikätre blo jatadi abko Pablokwe niebare arato. Kukwe ne mdenbtä abko tärä ne raba ni die mike mtare arato.

Pablota köbö ngwentari Titoye

1 Ti Pablo käta tärä ne tike mae Tito. Ti abko ni klabore Ngöbökwé amne Jesukristo kukwei ngwianka. Ngöbökwé ti mikani sribire kore ni dianinkä kwe jakrä die mikakäre tödeke kwatibe jabtí. Erere arato, kukwe era metre Ngöböbtä dirita nunkwe rükadre gare ni dianinkä Ngöbökwé yeye, abkokäre Ngöbökwé ti mikani sribire. Kukwe era metre Ngöböbtä ye tä ni die mike nüne Ngöbökrä. **2** Erere arato, nita tödeke Ngöböbti, ñobtä ñan angwane niara ngämi kä ne

dätere, känenkri ni dianinkä kwe jakrä, ye käkwe nünandi käreäre ben niebare kwe. Ngöbö abko ja kukwei kite ñakare temen, aiseite dre niebare kira kwe, ye erere rabadi bare. **3** Ngöbö kukwei kuin rabadre gare ni kwatiye abko köböi kitani Ngöbökwé, erere käi nukanina. Ye mden abko Ngöbö ni Diantarikä käkwe ti ara jire mikani dirire mtare.

4 Tito, nita tödeke ja kwrere Jesubti, aiseite ni töita ketetibe. Ma ti ngobo tikwe kwrere. Ngöbö ni Rün nikwe amne Kristo Jesu ni Diantarikä raba ja moto mike kuin makrä, amne makwe

nüna jame niaratre diebti, ie ti tö Tito.

Titokwe dre nuendre Cretate

5 Tito, tikwe ma mikateba kä butubti Cretate angwane, kukwe ükate ngämi, ye makwe ükadrete jökrä, abkokäre tikwe ma mikateba. Erere arato, nitre tödekaka Jesubti juta kwatirekwatire te, ye kanti makwe ni mikadre niaratre jie ngwianka, tikwe nieba mae ye kwrere, abkokäre ma mikateba tikwe. **6** Nitre ni jie ngwianka abko ni nüne era metre, aiseite kukwe ñakare kwe, btä ni mda mda raba kite ngise abko ni krörö mika sribire makwe: Ni gure itibe mika sribire makwe. Erere arato, ngäbriänkä kwekwe käta tödeke Jesubti amne tä nüne kuin, aiseite ngäbäre kwe diän diän amne dokwä ribi ribi ñan niedre btä. **7** Ngöböta sribi kwe mike nitre ji ngwianka kiseté, aiseite ni nüne era metre abko käkwe sribidre, ni mda mda ñan rabadre niara kite ngise abkokäre. Ne mden kiseté, ni tö bikabtä kri amne ni btä kukwe ñan matare abko ñan mikadre sribire. Erere arato, ni dröbaka, ni ngüdrekä ngwarbe ngwarbe amne ni ni ngökö ngwian diankrä jae abko ñan mika sribi ne nuene makwe arato.

8 Akwa ni ni Ngöbökwé jie ngwianka abko tädrera juto biare ni menteni kaen ngäbti ja juete amne tädrera kukwe kuinkuin tarere. Erere arato, ni töbike kuin ja käne amne, nüne era

metre amne, nüne deme Ngöbökrä amne, ñan tä nakwen jötrö jändrän jökrä jiebti, ni ye kwrere abko käkwe sribidre. **9** Mdakäre abko, Ngöbö kukwei metre diribare nunkwe, ye abko ketadrete dime ja kiseté angwane, rabadre dirire metre ni mda mdaye, niaratre die mikakäre. Erere arato, ni ñäkäkä blo Ngöbö Kukweibtä, ye tö diandre metre kwe, abkokäre Ngöbö kukwei era metre ketadrete dime ja kiseté.

10 Ni nüne kore makwe mika sribire, ñobtä ñan angwane nitre kwati dokwä ribi ribi kukwe metre Jesubtä kräke abko tä näin kukwe ütiäte ñakare dirire amne, tä näin ni ngökö ngwarbe. Nitre ne ngätäite abko nitre israelita kwati tä näin dirire blo siba abko käta ja ñäräkrä mikamna ja kwatabtä nitre israelita kwrere nitre tödekaka Jesubtiye rabakäre metre Ngöbö ngwärekre, nieta kwetre.

11 Nitre ye abko kada ketadre dirikätre era metrekwé, ñobtä ñan angwane kukwe ñan diridre jire, ye abko tätre dirire ngwarbe. Ye mden kanti ni kwati käkwe ja töi kwitaninta ngwarbe kwäräkwärä mräkä kwekwe ben ngöi. Erere arato, tätre dirire blo ngwian diankäre jae ni ngökabti.

12 Ni ni ngökaka kore, mdenbtä abko ngöbö ngwarbe kukwe niekä kira nünanka Cretate käkwe niebare mräkä niara käite btä krörö: Ni nünanka Cretate käre tätre ni ngökö, jändrän ngwarbe töi ñakare, kwrere jire

tätre nüne amne, tätre mröre ere, akwa neme trine ñakare amne krenekrene arato, niebare kwe. **13** Ne abko, nitre Cretabo nämene nüne ño abko erere niebare metre kwe btätre kore. Ne aisete kukwe kuin diribare Jesubtä nunkwe, yebtä nitre Cretabo tödekaka Jesubti kākwe ja tōi mikadre era metre, abkokāre ñākā metre ngwārebtā makwe. **14** Erere arato, nitre Cretabo tödekaka Jesubti kākwe ñan olo mikadre kukwe mikanintbe ngwarbe kirakira nitre israelita-kwe yebtä, abkokāre makwe ñākā ietre. Arato nitre kukwe era Jesubtä mikaka ngwarbe jae kātā dre dre nuemna, ye ie nitre Cretabo tödekaka Jesubti kākwe ñan olo mikadre, abkokāre makwe ñākā ietre. **15** Ye abko ni deme tödekaka Jesubti, krāke jändrän jōkrā kuin deme, ñobtä ñan angwane Ngöbōkwe dātebare; akwa ni ñakare tödekaka Jesubti abko krāke jändrän jōkrā kāmē, jändrän ñakare jire kuin deme krāke, ñobtä ñan angwane niaratre abko tōi diān amne, ja ruēn ngite ñakare ietre kukwe diān diānbtā. **16** Nitre dirikā blo ye abko, ie Ngöbō gare tätre niere, akwa tätre kukwe nuene kāmē-kāmē. Yebtä abko, Ngöbō gare ñakare ietre bā mikata kwetre jabtā, ñobtä ñan angwane jändrän jōkrā kāita neme kāmē btätre. Niaratre dokwā ribi ribi amne, tā Ngöbō mike tāte ñakare amne, jändrän kuin nuendre abko erere neme bare ñakare ietre.

Dre diridre

2 **1** Tito, Ngöbō Kukwei diridre ño era metre, ye kwrere makwe diri abko krörō: **2** Ni brare unbre unbre ñan rankwa jōtrō jändrän ngwarbe jiebti amne, töbika kuin ja kāmē kwe amne, niara rabadre ütiāte, abkokāre nūna kuin kwe ni mda mda okwābti abko makwe diri ietre. Erere arato, Jesukristo kukwei mika era kwe amne, raba ni mda mda tarere ja moto kuinbti. Erere arato, nane kukwe jata tare niara rüere angwane, nūnanka dite kwe jabtā, makwe diri ietre Tito.

3 Ne kwrere arato, makwe diri krörō meri unbre unbreye: Meri unbre unbre abko kākwe nūnandre deme Ngöbō mikakāre ütiāte jae amne, ñan blita ngwarbe kwetre ni mda mdabtā. Erere arato, ñan drōba kwe amne, nūnandre ño kuin abko diri kwetre meri bati batiye abko krörō: **4** Meri bati gure gure kākwe brare kwe btā ngābriānkā kwe tare-dre ño, ye jiebti jie tika kwetre. **5** Mdakāre abko, meri bati gure gure kākwe töbika kuin ja kāmē ja ngibiakāre deme. Niaratrekwe ñan töbika ni brare mda mdabtā amne, ju ngibia kuin kwetre jakrā arato. Erere arato, ni mda mda die mika kwe amne, brare kwe kukwei mikadre tāte kwe, ye jiebti meri unbre unbre kākwe jie tika. Meri bati gure gure kākwe nūnandre kore, ni mda mdakwe ñan ñākādre blo Ngöbō Kukwei rüere abkokāre.

6 Ne kwrere arato, ni bati bati abko kākwe töbikadre kuin ja kāmē abko jiebti makwe kita. **7** Akwa nūnandre ño kuin, ye abko makwe nūna kāmē bā mikakāre nitre bati batiye. Ye erere, nūnandre ño Ngöbō ngwārekri rükadre gare ietre. Erere arato, ma rika dirire angwane, kukwe kuin ütiāte dirita ye kwrere makwe diri era metre ietre. **8** Erere arato, ni mda mdakwe ñan kukwe kāmāndre ma rüere, abkokāre makwe kukwe era erere aibe diri. Ye ngwane, mun rüere rabadī ja gaire, ñobtä ñan angwane kukwe ñan kwandre ietre ñākākāre nitre tödekaka Jesubti ye rüere.

9 Mdakāre abko, nitre klaborē, yeye makwe diri krörō: Nitre klaborē abko kākwe bkānkā kukwei mika tāte jändrän jōkrābtā amne, ja moto mika jāme kwetre bkānkākrā amne, ñan ja kweta kwetre bkānkābe abko makwe diri ietre. **10** Erere arato, ni klaborē ye bkānkākwe tödekadre bti, abkokāre sribi nuen kuin era metre kwetre amne ñan jändrän goidre kwetre kām abko makwe diri ietre. Ni klaborē kākwe bkānkā mikadre ütiāte kore ne ngwane, kukwe dirita nunkwe Ngöbō ni Diantarikābtā rabadī tuen bā nuāre ietre.

11 Nitre tödekaka Jesubti kākwe nūnandre kore, ñobtä ñan angwane Ngöbōkwe jändrän kuin nuenbare ja moto kuinbti nikrā, mden köböire tā biare ni jōkrā dentari. **12** Ngöbōkwe jändrän kuin nuenbare ja moto

kuinbti nikrā, ye kātā kukwe krörō mike gare nie: Jändrän jōkrā Ngöbō rüere, ye nikwe kitadre jōkrā temen amne, kukwe kāmēkāmē kāmē nebtā, ye nikwe ñan nuendre mda, akwa nikwe töbikadre kuin ja kāmē. Erere arato, nikwe ja tōi mikadre kwatibe nūnakāre deme Ngöbōkrā kāmē ne ngwane. **13** Nikwe nūnandre kore Jesukristo ngibiare ngābti kwārā. Jesukristo abko Ngöbō nikwe amne ni Diantarikā nikwe. Niara ara rükadita kāmē trā ngwente angwane, kāmē rabadī nuāre nibtä, abkobti nita tödeke aune nita ngibiare kisere. **14** Jesukristokwe ja biani müre ketadre ni krāke ni kökatarikāre Ngöbōkrā, nikwe ñan kukwe diān diān nuendre mda abkokāre. Erere arato, ni ngite kukwe kāmēte dianakrā jōkrā nibtä amne, ni rabadre juta jen kwe amne ni rabadre töbika jändrän kuin nuenbare, abkokāre ja biani müre ketadre kwe nikrā.

15 Kukwe ye abko, makwe diridre. Makwe ni mda mda die mika kukwe ne mike tāte. Erere arato, Ngöbō diebti makwe ñākā ni kukwe kāmēkāmē nuenkāye, ñobtä ñan angwane Ngöbōkwe ma mikani ji dokwāte, aisete makwe ñan ni mda tuemetre ma mike ngwarbe jae.

Nitre tödekaka Jesubti kākwe jändrän kuin nuendre

3 **1** Mdakāre abko, nitre tödekaka Jesubti, ye kākwe gobran amne kritobo mika ütiāte jae amne kukwei mika tāte

kwetre. Erere arato, tädre biare jändrän kuin nuene. Ne abko, makwe ngwianta töre käre ietre. 2 Mdakäre abko, ñan blitadre ngwarbe ni mda mdabtä kwetre. Erere arato, ñan rüdre ni mda mdabe akwa, nünandre jame kwetre ni mda mdabe. Erere arato, ni mdakwe kukwe nuendre blo rüdre angwane, ja ngie mikadre ñakare kwetre amne, ja getadre jame ni jökräbe kwetre. Ne abko, makwe ngwianta töre käre ietre arato Tito. 3 Ngöbö gare ñakare nie angwane, ni töi ñakare, kwrere jire ni nämane nüne amne, ni nämane ja dokwä mike ribi Ngöbökrä. Arato kukwe ngwarbe diri nämane nie abko jiebtä ni nämane näin ngwarbe siba amne jändrän kämekäme bätäkä ngwarbe abko mdei nämane nie, erere ni nämane nuene. Mdakäre abko, ni nämane töbike blo ni mda mdabtä amne jändrän ni mdakwe, ie ni tö nämane nebe jakrä. Erere arato, ni nämane bätä ngwen jökrä jabtä kwärikwäri.

4 Akwa Ngöbö ni Diantarikä käkwe jändrän kuin nuenbare nikrä amne ni jökrä tarebare kwe abko mikani gare kwe nie, ye ngwane 5 ni dianintari kwe. Ye abko, ñan nikwe jändrän kuin nuenbare, abko ütiäre Ngöbökwé ni dianintari, akwa ni nämane ruentari tare ie, aiseite ni dianintari kwe. Ye ngwane ni nämane käme jändrän dobrore kwrere kukwe kämekäme kisete angwane, ni därebareta bobukäre Ngöbö Üai Deme köböire angwane,

Ngöbökwé ni jükaninte kuin merebe ja Üai Deme köböire. 6 Ni dianintari kwe angwane, Jesukristo ni Diantarikä, köböire Ngöbökwé ja Üai Deme biani täte jökrä nie ja moto kuinbti. 7 Ngöbökwé ni dianintari angwane, niara nämane ni tare. Yebtä ni ngite ñakare mda ja ngwärekwé niebare kwe ja moto kuinbti abko köböire ni rabadre neme ngobo jen kwe abkokäre. Ye mdenbtä Ngöbökwé ni mikadi nüne kärekäre, yebti ni raba tödeke kwatibe mtare. 8 Kukwe ne abra kukwe era metre, aiseite nitre tödekaka Jesubti, ye ben makwe blita käre kukwe nebtä, ie ti tö, ñobtä ñan angwane kukwe ne abko kukwe kuin ni jökrä kräke, aiseite nitre tödekaka Ngöböbtä tädre biare jändrän kuin nuene, abkokäre makwe blita käre ben kukwe nebtä.

9 Akwa kukwe mda abko ngwarbe amne tä ni die mike ñakare, aiseite kukwe ni mräkä kirakirabtä amne Kukwe Biani Ngöbökwé Moiséye nuendre nie, yebtä makwe ñan ja kweta, ñobtä ñan angwane kukwe ngwarbe ütiäre ñakare btä nita ja kwete, abtä rüta niken jabe kwärikwäri. 10 Akwa nitre tödekaka Jesubti ngätäite, nireta ja kwete kukwe ngwarbe yebtä amne tä nitre tödekaka Jesubti töi mike romon jakrä kwärikwäri, ye abko ie makwe ñäkä bati, bobu töi diankäre. Akwa nebti ma ñan kukwe mika täte kwe ne ngwane, ñan rikadre mda gätäbtä nitre tödekaka Jesubti yebe abko

makwe nie ie, 11 ñobtä ñan angwane ni ye abko töi ñakare metre amne, kukwe nuenta kämekäme kwe arabe käta niara mike ngite Ngöbö ngwärekwé.

Pablota kukwe mrä niere Titoye

12 Tito, tikwe Artemas ya o Tiquico juandi ma kanti Cretate yete, niaratre nibu ne mden raba ma kanti angwane, ma jata jötrö juta Nicópolis ti ngäbtä ja tuakäre tibe, ñobtä ñan angwane kä ñüre näire ti tö nünai juta Nicópolis aiseite. 13 Arato Zenas, ni blitaka ni mdakrä kritobo ngwärekwé, btä Apolos, ye jata nikenta angwane, ma btä nitre tödekaka

Jesubti käkwe die mika. Mun-kwe jändrän bian täte ietre, ñan ja tare nikadre kwetre abkokäre, 14 ñobtä ñan angwane nirekwe jändrän ñakare, ye abko nitre tödekaka Jesubti käkwe ja töiti-kadre jändrän kuin nuene ni die mikakäre. Ne kwrere nitre tödekaka Jesubti käkwe ñan nünandre ngwarbe abkokäre. 15 Nitre tödekaka Jesubti jökrä tä tibe nete käta köbö kuin juen mae Tito. Erere arato, nire nire käta nun tarere ma kanti yete, ye kräke nunta köbö kuin juen arato.

Ngöbö raba ja moto mike kuin mun jökrä kräke. Ne abko kore. Ne ngörä.